

MATAUPU VASEGA AMATA 2020

MANATU AOAO: SAILI MUAMUA LE MALO O LE ATUA MANATU TA'IALA O IANUARI & FEPUARI: O LE ATUA I LE AMATAGA.

Ua filifilia le manatu ta'iala, "O le Atua i le amataga" e amata ai mataupu o le tusi o lenei Masina. O le faamoemoe lava ina ia a'oa'oina fanau laiti a le Ekalesia i ulua'i tala o le Tusi Paia, aemaise lava i tala o le Fofoaga.

ASO SA: 26 IANUARI 2020
MATAUPU: O LE ATUA FOAFOA
SINI: Ia malamalama tamaiti i le uiga o le upu fofoa.
TUSI FAITAU: Kenese 1: 1 – 3 (mo le Faiaoga)
Kenese 1: 1 (mo le Vasega)

Na faia e le Atua le lagi ma le lalolagi i le amataga.

FESOASOANI MO FAIAOGA:

Tamaiti, o le uiga o le upu fofoa, o mea fou ua faia po o mea faatoa fai. A o lei i ai se lalolagi a ua i ai le Atua. O le Atua la lea na ia fofoaina le lagi ma le lalolagi. Sa leai lava se mea na i ai i le lalolagi.

O mea uma lava na faia i le lalolagi, na faia lava e le Atua. Na Ia tuu'ese'eseina foi le eleele matutu ma le suasami. O le lagi ma le vanimonimo ma mea uma lava o i ai, o mea lava na, na fofoaina pe na faia e le Atua. O le Atua pule aoao, le Atua e pule i mea uma, le Atua na faia mea uma lava o lo o tumu ai le lagi ma le lalolagi. O le Atua pule aoao, o le Atua foi lea na ia faia le tagata i lona faatusa. O lona faamoemoe, ia foliga atu pea lana tagata na fai ia te Ia. O le tauluga lea o ana galuega fofoa, o le faia lea o le tagata na te vaaia ma tausia mea uma o lana fofoaga, ina ia faatumauina lona matagofie ma lona lelei.

GALUEGA FAATINO: Valivaligā Ata.

Valivali ata o mea o le fofoaga o lo o auina atu i le tusi, pe saunia e lau susuga nisi ata.

PESE: Na faia e le Atua mauga maualuluga

A'OA'OGA:

1. Faataua ma faapelepele i galuega fofoa a le Atua.
2. O le Atua na faia mea uma.

NA FAIA E LE ATUA MEA UMA LAVA I LE AMATAGA



ASO SA:

2 FEPUARI 2020

MATAUPU: O KAINO MA APELU, O TAGATA GALULUE

SINI: Ia malamalama le vasega, o Kaino ma Apelu, o tagata galulue.

TUSI FAITAU: Kenese 4: 1 – 2 (mo le Faiaoga)
Kenese 4: 2 (mo le Vasega)

O Apelu foi o le leoleo mamoe o ia, a o Kaino o le galue fanua ia.

FESOASOANI MO FAIAOGA:

O Atamu ma Eva, o ulua'i tagata ia na faia e le Atua i le lalolagi. Sa fanau mai iā i la'ua ni tama se to'alua, o Kaino ma Apelu. O Kaino, o ia o le ulumatua. O Apelu, o ia o le ui'i. O le uiga o le igoa o Kaino, o 'maua', auā sa faapea le manatu o lona tinā o Eva, "Ua ou maua le tagata mai le Alii." O lenei au uso, o ni tagata galulue.

O Apelu, o ia o le leoleo mamoe. O lana galuega e aofia ai:

- le tausia ma le vaaia lelei o le lafu mamoe
- ta'ita'i le lafu mamoe i se vao mu'a po o se fanua laugatasi e fafaga ai
- ta'ita'i le lafu mamoe i vaitafe e faafeinu ai.
- leoleo ma puipui le lafu mamoe mai i isi manu fe'ai o le vao.

O Kaino, o ia e galue i le fanua. O lana galuega e aofia ai:

- le totōina o laau 'aina po o laau e 'aina o latou fua
- galue e faato'a le fanua ina ia mamā ma lelei le palapala e ola lelei ai laau toto
- totōina o ma'umaga ma faato'aga;

Tamaiti, ia tatou ola e pei o lenei 'au uso o Kaino ma Apelu, auā sa fiafia e galulue e fai mea lelei ma mea e sili mo le tausiga o ō la matua ma le latou aiga.

GALUEGA FAATINO: Valivaligā Ata

Ia fai ni kopi o le ata ua saunia e tufa i le vasega e galulue ai.

PESE: When we all work together
Afai tatou te galulue faatasi.

A'OA'OGA:

1. Ia tatou fiafia e ola galulue.
2. O Kaino ma Apelu, o ni tagata galulue
3. E fa'aaogā i tatou e le Atua mo ana galuega.

ASO SA: 9 FEPUARI 2020

MATAUPU: O APERAMO USITA'I

SINI: Ia malamalama le vasega, na usita'i Aperamo i le valaau a le Atua.

TUSI FAITAU: Kenese 12: 1 – 5 (mo le Faiaoga)
Kenese 12: 1 (mo le Vasega)

*Ua fetalai mai le Alii ia Aperamo, Ia tuua e oe o lou nuu, ma tagata o lou nuu,
ma le aiga o lou tamā, ae alu atu i se nuu ou te faasino atu ai ia te oe.*

FESOASOANI MO FAIAOGA:

O le valaauina e le Atua o Aperamo e tuua lona nu'u ma ona tagata, ae alu i se isi nuu na te le iloa, o se tulaga e matuā faigata ona taliaina e se tagata. O ai a fia alu, o lea ua mautū tulaga uma mo le atiina'eina o lona aiga ma lona nuu?

Ae ui i lea, na usita'i lava Aperamo i le valaau a le Atua. Ua ia ave Sarai lana avā, ma Lota le atalii o lona uso, ma a latou oloa uma na maua i Karana, ona latou o atu ai lea i le nuu na faasino i ai e le Atua e o i ai, o le nuu lea o Kanana. O le fitusefulu ma le lima o tausaga o Aperamo, na ia tuua ai Karana mo Kanana. O le usita'i o Aperamo i le valaau a le Atua, o le faailoga lea o lona talitonu ma faatuatua i le Atua. E ui lava ina le iloa, ma lē mautinoa e Aperamo le mea o le a alu atu i ai, ae ua faamuamua iā te ia lona faalogo ma usita'i i le finagalo o le Atua.

Mulimuli ane, e ma'eu le anoanoa'i o faamanuiaga e maua e le tagata usita'i ma faalogo i le Atua, e pei o lenei tamā o Aperamo.

GALUEGA FAATINO: Valivaligā Ata

Ia fai ni kopi o le ata ua saunia e tufa i le vasega e galulue ai.

PESE: Aperamo, Aperamo na valaau i ai le Atua
Aperamo, lou nuu ma le aiga ia tuua
Aperamo, Aperamo le tamā faatuatua
Aperamo, ua faalogo ma usita'i i le Atua

Fati: Sit down, sit down, you're rocking the boat
Nofo i lalo, nofo i lalo, ma ia luelue le vaa

A'OA'OGA:

1. Na faalogo ma usita'i Aperamo i le Atua
2. E manuia le tagata e faalogo ma usita'i i le Atua.

ASO SA: 16 FEPUARI 2020

MATAUPU: O IOSEFA LE ATALII O IAKOPO

SINI: Ia malamalama le vasega, na alofagia Iosefa e lona tamā.

TUSI FAITAU: Kenese 37: 1 – 4 (mo le Faiaoga)
Kenese 37: 3 (mo le Vasega)

Sa sili le alofa o Isaraelu ia Iosefa i ona atalii uma, auā na fanau o ia ina o toeaina ia; ua fai se ofu talaloa mona.

FESOASOANI MO FAIAOGA:

O Iosefa, o se tasi o fanau po o atalii a Iakopo po o Isaraelu iā Rasela. Sa sili ona alofa Iakopo i lona atalii lenei o Iosefa i ona atalii uma, auā na fanau o ia ina o toeaina o ia. E le gata i lea, o ia o se tama amio lelei, usita'i ma alofa i lona tamā.

Sa galulue faatasi Iosefa ma ona uso i le tausiga o lafu manu a lo latou tama. E talatalanoa foi i lona tamā, ma ia ta'uina atu i ai amioga lē lelei a isi o ona uso. Atonu o le isi lea mafuaaga e sili ai le alofa o Iakopo i lona atalii lea, auā e uma ona ta'u e le tama i lona tamā mea faa-lē-lelei a ona uso e fai.

O Iosefa foi, o se tama e fai miti. Na faailoa mai ai e le Atua lona finagalo mo ia i le lumanai. O le alofa tele o Iakopo i lona atalii o Iosefa, na ia faia ai se ofu talaloa felanulana'i mo ia.

GALUEGA FAATINO: Valivaligā Ata

Ia fai ni kopi o le ata ua saunia e tufa i le vasega e galulue ai.

PESE: I've got peace like a river x 2
I've got peace like a river in my soul
I've got peace like a river x 2
I've got peace like a river in my soul

I've got love like the ocean x 2
I've got love like the ocean in my soul
I've got love like the ocean x 2
I've got love like the ocean in my soul

I've got joy like a fountain x 2
I've got joy like a fountain in my soul
I've got joy like a fountain x 2
I've got joy like a fountain in my soul

I've got peace like a river
I've got love like the ocean
I've got joy like a fountain in my soul } x 2

A'OA'OGA:

1. E sili ona alofa Iakopo iā Iosefa i ona atalii uma
2. O Iosefa, o se tama e amio lelei.

ASO SA: 23 FEPUARI 2020

MATAUPU: UA AUMAI E IOSEFA LONA AIGA I AIKUPITO

SINI: Ia malamalama le vasega, o le alofa moni o Iosefa i lona tamā ma lona aiga, na ia aumaia ai i latou i Aikupito.

TUSI FAITAU: Kenese 47: 1 – 12 (mo le Faiaoga)
Kenese 47: 12 (mo le Vasega)

Ua fagaina foi e Iosefa lona tamā, ma ona uso, ma le aiga atoa uma a lona tamā i le mea e 'ai ua oo lava i o latou tama iti.

FESOASOANI MO FAIAOGA:

O le mataupu o lenei aso, o le faataunuaina o le mana'o o Iosefa, ina ia aumai lona tamā o Iakopo, ma ona uso, ma lona aiga atoa i Aikupito, ina ia nonofo ma aumau ai.

O le mana'o o Iosefa, ia vave oo mai lona tamā ma lona aiga i Aikupito, ina ia faaolaina ma lavea'iina i latou mai tausaga o lo o totoe o le oge.

Ua taunuu le mana'o o Iosefa. Sa alofagia e le tupu o Farao Iosefa ma lona aiga atoa, ma ua latou nonofo ai loa i Kosena. Sa poloa'i Farao iā Iosefa, e fai mo i latou lea nuu, auā o fanua e pito i sili ona lelei ia o Aikupito atoa.

Tamaiti, e faapea lava le alofa tunoa o le Atua mo i tatou le fanau, e pei o lona alofa iā Iosefa ma lona aiga.

GALUEGA FAATINO: Valivaligā Ata

Ia fai ni kopi o le ata ua saunia e tufa i le vasega e galulue ai.

PESE: We are one big happy family
God's family x 2

We are one big happy family
God's family are we
He is my brother
She is my sister
Our father in Heaven
Who loves you and me

O i tatou o le 'au aiga
'Au aiga o le Atua
O i tatou o le 'au aiga
Aiga o le Atua
O oe o lo'u tuagane
O oe o lo'u tuafafine
O le tamā i lugā
E alofa iā te oe ma a'u

A'OA'OGA:

1. Ia tatou alolofa moni i o tatou matua
2. O le alofa o le Atua e faaolaina ai i tatou.
3. Na aumai e Iosefa lona aiga i Aikupito.

MANATU TAIALA O MATI: O NISI O NOFOAGA TĀUA I LE TUSI PAIA.

O le manatu o lenei masina, o loo fa'atāua ai nisi o nofoaga tāua sa tutupu ai nisi o tala ma nisi o mea tāua, e pei ona faamauina i le Tusi Paia. Ua tele tala ua faamatalaina, ae ao foi ona iloa e le fanau o nofoaga na tutupu ai, ma mafuaaga na maua ai nisi o nofoaga e pei ona faamauina.

ASO SA 1 MATI 2020.

MATAUPU: O PETELEEMA

SINI: Ia malamalama le vasega i le tāua o lea foi nuu o Peteleema, e pei ona faalogo soo i ai mai tala o le Tusi Paia.

TUSI FAITAU: Mataio 2:1-6 (faiaoga)
Mataio 2:1 (vasega)

Ua fanau Iesu i Peteleema i Iutaia i ona po o Herota le tupu, faauta, ua oo mai ai makoi mai sasae i Ierusalema.

FESOASOANI MO FAIAOGA:

Fesili muamua lava i tamaiti, po o ai le igoa o le latou nuu. "O ai le igoa o le tatou nuu?". Lelei! O le masina lenei, o le a o tatou talanoa ai i nisi o nuu o le Tusi Paia, sa tutupu ai nisi o mea tāua.

O le nuu Ia o le a o tatou talanoa i ai i lenei Aso Sa, o Peteleema. O Peteleema tamaiti, o le nuu lea na fanau ai le Alii o Iesu. O se nuu e le telē, ae laititi. O Peteleema foi, o le taulaga o le nuu o Iutaia. E ui la i le la'ititi o Peteleema, ae ua faamauina o le nofoaga na fanau mai ai le Alii o Iesu lo tatou faaola i le lalolagi.

GALUEGA FAATINO: Valivaligā Ata.

Fai ni kopi o le ata o loo auina atu i le tusi.
Tufa i le vasega mo le valivaliina.

PESE: (fati: Le Ekalesia ua gasolo)
Ua fanau mai Iesu, i Peteleema.
O le aai e tu i Ierusalema
Ua fiafia ai lagona, o Ia o le Faaola
Ua afio mai e faia le togiola.

A'OA'OGA:

1. O Peteleema le nuu na fanau ai Iesu.
2. Ia teuteu o tatou nuu.



ASO SA 8 MATI 2020.

MATAUPU: O MORIA

SINI: Ia malamalama le vasega i le tāua o le nuu o Moria.

TUSI FAITAU: Kenese 22: 2, 2 Nofoaiga a Tupu 3:1 (mo le Faiaoga)
Kenese 22: 2 (mo le Vasega)

Ona fetalai mai lea o Ia, “Ia e ave lou atalii, o lou atalii e toatasi, o le ua pele ia te oe, o Isaako lava, ma e alu i le nuu o Moria; ma avatu ia te ia e fai ma taulaga mu i lea mea, i le tasi mauga ou te ta’uina atu ia te oe”.

FESOASOANI MO FAIAOGA:

O Moria, o le nuu e tu i le mauga. O le mafuaaga lea e faaigoa ai e nisi, o le mauga o Moria. Ua tāua tele lea nofoaga, i nisi o mea na tutupu ai. O le nuu lea na fetalai ai le Atua ia Aperaamo, e ave i ai lona atalii o Isaako, e osi ai le taulaga ia te Ia, e pei ona faamauina i le Kenese.

E le gata i lea, a o Moria foi, na fausia ai e le tupu o Solomona le ulua’i malumalu po o le falesa, mo tapua’iga i le Atua. Auā o le malumalu, po o le falesa, e faaigoaina o le Fale o le Atua, mo tagata uma e vivii ma tapua’i i le Atua i taimi o sauniga lotu.

Tamaiti! O Moria po o le mauga o Moria, o le nofoaga mo taulaga i le Atua. O le nofoaga sa filifilia e le Atua, mo tagata uma e faitaulaga atu ai ia te Ia.

GALUEGA FAATINO: Valivaligā Ata

Fa’aaoga ata o lo o auina atu i le tusi.
Tufa i le vasega ni kopi o ata mo le valivaliina.
Taumafai e fesili i le vasega po o a ata o lo o latou valiina.

PESE:

O Moria o le nuu e Paia
O le Atua o Ia na filifila
Aperaamo ia Isaako le taulaga ia osia
O le faatuatua e moomia.

O Moria o le mauga e Paia
Filifilia mo le malumalu ina ia fausia
Solomona tula’i mai e ta’ita’ia
Ina ia mae’a fiafia.

(fati: Sa tatalo le teine o Hana)


A'OA'OGA:

1. O Moria o le nofoaga e Paia.
2. Ua faia le Fale o le Atua i Moria.
3. O Moria na ave i ai e Aperaamo lona atalii o Isaako.

UA AVE E APERAAMO LONA ATALII O ISAAKOI LE MAUGA O MORIA E PEI ONA FAATONUINA E LE ATUA



UA FAUSIA E SOLOMONA LE MALUMALU I LE MAUGA O MORIA



ASO SA

15 MATI 2020.

MATAUPU:

O NAINA

SINI: Ia malamalama le vasega i le vavega na faia e Iesu i le aai o Naina.

TUSI FAITAU: Luka 7:11 – 15 (mo le Faiaoga)
Luka 7:11 (mo le Vasega)

Mulimuli ane ua maluu atu o Ia i le aai, o Naina le igoa, ua o faatasi ma Ia ona so'o e toatele, ma le motu o tagata e toatele.

FESOASOANI MO FAIAOGA:

O le aai o Naina ua na o se nuu e le to'atele ni tagata e nonofo ai. O lea aai itiiti, e i totonu lava o se vaega mauualalo o Kalilaia ma e le mamao ese ma Nasareta. O le t'aua ai o le aai lea, ona o le vavega na faia ai e le Alii o Iesu. Ua Ia toe faatuina le tama na oti, a le fafine ua oti lana tane po o le tinā ua leai sona to'alua.

Ina ua taunuu atu Iesu, ae fata mai si tama ua oti a o si tama lava e to'atasi a si tinā nofo to'atasi. O le ofoofogia ai la o le vavega na faia ai e Iesu i totonu o le aai o Naina, ua na o le fetalai atu lava o Iesu, "Le taulealea e, ou te fai atu ia te oe, ina tula'i ia" ona toe ola ai lea o le tama ma nofo a'e i luga ma tautala. O se tala na aave ma soo uma ai Iutaia ma o latou loto ua vivii i le Atua.

GALUEGA FAATINO: Valivaligā Ata

Fai ni kopi o le Ata ma tufa i le vasega mo le valivaliina.
Ia taumafai ina ia fesili i le vesega po o le a le ata o loo valivaliina.

PESE: O lima agalelei o Iesu.

A'OA'OGA:

1. Ua toe ola le tama na oti i Naina.
2. E i ai lava le Atua i so o se mea.
3. E fesoasoani le Alii i so o se tagata.

Ua toe faaola e Iesu le tama na oti



MATAUPU: O PETANIA

SINI: Ia malamalama le vasega, i le tāua o le loto faafetai.

TUSI FAITAU: Ioane 12: 1 – 2 (mo le Faiaoga)
Ioane 12: 1 (mo le Vasega)

Ua maliu atu Iesu i Petania, a o toe ono aso i le fai ai le paseka, sa i ai Lasalo na oti, na Ia toe faatu ia te ia nai e ua oti.

FESOASOANI MO FAIAOGA:

O Petania, o le nuu lea o le tama o Lasalo, lea na toe faatuina mai e le Alii o Iesu nai e ua oti. Manatua foi le tama o Lasalo lea sa oti, ma tuu i le tuugamau i aso e fa (4), ae na toe faatuina mai e Iesu. O le nofoaga tonu lea e nofo ai o ia. Lea ua toe asiiasi i ai le Alii o Iesu faatasi ma ona so'o. Sa fiafia le aiga o Lasalo, o ia ma ona tuafafine o Maria ma Mareta, ina ua toe afio atu le Alii o Iesu sei toe mafuta i ai ma talatalanoa i ai, aemaise ai, o le manatua pea o le alofa o le Alii, lea ua mafai ai ona ia toe maua le olaga e ala i lona toe ola mai le tuugamau.

Sa saunia e Lasalo ma ona tuafafine le taumafataga po o le aiga, ina ia latou aai faatasi ai ma Iesu ma ona so'o. O se valaaulia lelei lea, e pei foi ona masani ai o tatou aiga, aemaise i o tatou matua pe a afe atu nisi i o tatou aiga. O le faaaloalo, o le tu ma le aga lea e tatau lava ia i tatou uma lava. Ma o le finagalo moni lava lea o le Alii mo i tatou.

GALUEGA FAATINO: VALAAULIA

O le a le valaau e fa'aafe mai ai se tagata i lou fale?

Afe mai ia i fale nei...

Susū mai ia....

Sau loa ta aai...

Fa'aa'oa'o le fanau ina ia iloa ona valaaulia se tagata e tusa o le fa'aaloalo a tagata Samoa.


PESE: fati: Sa tatalo le teine o Hana.

Iesu ma ona so'o ua afe fiafia
I le fale o Lasalo le Petania
Le meaai ua tapena se i tali le sua
Ma faafoi le viiga i le Atua.

A'OA'OGA:

1. Ia fiafia e mafuta ma le Alii.
2. Ia lagona le loto faafetai i taimi uma.

3. Ia manatua le alofa o le Alii.



MATAUPU: O KILIKALA

SINI: Ia malamalama le vasega i le mea e tāua ai Kilikala.

TUSI FAITAU: Iosua 4:19-24 (faiaoga)
Iosua 4:20 (vasega)

Ona faatuina lea e Iosua i Kilikala o na maa e sefulu ma le lua na latou avae i Ioritana.

FESOASOANI MO FAIAOGA:

O le malaga a le nuu o Isaraelu mai Aikupito e aga'i atu i Kanana le nuu folafolaina, sa le i fagofie. Ua mavae atu le taitaiga a le toeaina o Mose, ona tuuina lea ia Iosua na te faaauauina le taitaiina o le nuu. E oo atu le nuu i le vaiatafe o Ioritana, ua tafe tetele, ma ua le mafai ai ona sopoia atu le isi itu o le vaiatafe. Sa faatonuina e le Atua o Iosua, i mea e ao ona fai, ma sopoia atu ai le vaiatafe.

O lea la ua taunuu saogalemu le nuu o Isaraelu i le isi itu o Ioritana, ma ua faapotopotoina i le elelee e ta'ua o Kilikala. O i tonu lea na faatuina ai e Iosua o maa e sefulu ma le lua na aumai mai totonu o le vaiatafe o Ioritana, ina ia fai ma faamanatu o le alofa o le Atua, na mafai ai ona sopoia le vaiatafe o Ioritana ma le saogalemu. O maa e sefulu ma le lua, o loo faauigaina ma faatatau i ituaiga e sefulu ma le lua o le nuu o Isaraelu.

GALUEGA FAATINO: Taligā Fesili

1. O ai le igoa o le elelee sa nonofo ai Isaraelu?

Tali: O Kilikala.

2. E fia maa na faatuina e Iosua?

Tali: E 12.

3. Aisea ua faatuina ai ia maa?

Tali: E faamanatu ai le alofa o le Atua.

TAULOTO:

Isaraelu sopoia Ioritana

Taunuu manuia i Kilikala

Iosua faaputu o maa

E faamanatua le faaolataga

A'OA'OGA:

1. E le tuulafoa'i le Atua i ona tagata.
2. E i ai le Atua i mea uma.



MANATU TAIALA APERILA: O LE ESETA MO TAGATA UMA

Ua avea le manatu ta'iala e pei ona tā'ua i luga e faa-autū i ai mataupu o lenei masina. O loo amata mai ai i le malaga faa-tupu a Iesu ma lona toetu mai le oti ma le tuugamau. O galuega alofa a lo tatou Faaola e ala i ana faamalologa, aemaise o le a'oa'o atu i tagata.

ASO SA: 5 APERILA 2020

MATAUPU: O LE MALAGA FAA-TUPU A IESU (Aso Sa Laupama)

SINI: Ia malamalama le vasega, o le asini na tietie ai Iesu i lana malaga faa-tupu.

TUSI FAITAU: Mataio 21: 1 – 9 (mo le Faiaoga)
Mataio 21: 2 (mo le vasega)

Ua faapea atu ia te i la'ua, "Lua te o atu i le aai ua lumanai oulua, ona iloa atu loa lea e oulua o le asini ua nonoa, lua te tatalaina, i le taitai mai ai iā te au."

FESOASOANI MO FAIAOGA:

A o aga'i atu le faigamalaga a Iesu ma ona so'o i Ierusalem, ua oo atu i le mauga o Olive, ona faatonuina lea e Iesu o ona so'o e to'alua, e o atu i le aai o loo latalata ane, la te maua ai le tama'i asini o loo nonoa. Ia la tatalaina, ma aumai iā te ia. "Afa'i ae fesili ane se tasi ia te oulua, ia oulua fai atu, e mana'o i ai le Alii."

Sa usita'i le auso'o i le faatonuga a Iesu. Ua la maua le tama'i asini, ma ta'ita'i ma iā te ia. Ua latou fola ofu i luga o le asini, ma faati'eti'e ai Iesu. O le motu o tagata ua fola o latou ofu ma lālā o laau ma laupama i le ala, a o Afio mai Iesu i luga o le asini. Ua latou alalaga foi, "Osana i le alo o Tavita; Ia manuia lē afio mai i le suafa o le Alii. Osana i mea e aupito i luga."

Uiga o Upu:

- i) Osana: Ia e faaola mai/Ia e lavea'i mai.
- ii) laupama: O le faailoga o le manumalo.
O le malaga manumalo faa-tupu a Iesu i Ierusalem

GALUEGA FAATINO: Faatino le tala

Ia faatino e le vasega le tala e pei ona faamatalaina i le mataupu.

PESE: Osana pepese (tamaiti uma) x 3
Osana pepese tamaiti uma
Ua afio mai le tupu

Ua tietie atu (i Ierusalem) x 3
Ua tietie atu i Ierusalem
I luga o le asini

Ua latou fola (laupama i le ala) x 3
Ua latou fola laupama i le ala
Ua afio mai le tupu.

A'OA'OGA:

1. O le tama'i asini na malaga ai Iesu i Ierusalem
2. Sa fola e tagata laupama i le ala
3. O le malaga a Iesu o le malaga a le tupu loto maulalo.

ASO SA: 12 APERILA 2020

MATAUPU: UA TOE TU IESU (Aso Sa Toetu)

SINI: Ia malamalama le vasega, na toetu Iesu nai e ua oti.

TUSI FAITAU: Mareko 16: 1 – 8 (mo le Faiaoga)
Mareko 16: 6 (mo le Vasega)

A ua fai atu o ia ia te i latou, “’Aua tou te matata’u; o lo o outou saili ia Iesu le Nasareta o le na faasatauroina; ua tu o ia; e le o iinei, inā matamata ia i le mea na latou tuuina ai o Ia.”

FESOASOANI MO FAIAOGA:

O le taeao o le aso muamua o le vaisapati, na o ai Maria le Makatala, o Maria le tinā o Iakopo, ma Salome e asiasi i le tuugamau o Iesu, ma ave a latou mea manogi na faatau e u’u ai le tino o Iesu. Na latou o ma talatalanoa, po o ai o le a fulieseina le maa o loo pupuni ai le gutu o le tuugamau mo latou.

Ina ua latalata atu i latou i le tuugamau, ma latou iloa atu, ua uma ona fulieseina le maa. Ua latou o atu, ma iloa ai le taule’ale’a o loo nofo i le itū taumatau, o loo ofu i le ofu pa’epa’e, ona latou fefefe ai lea. A ua fai atu o ia i fafine, “’Aua tou te matata’u, o loo outou saili ia Iesu le Nasareta, o lē na faasatauroina; ua tu o Ia, e le o iinei.... A ia outou ta’u atu i ona so’o, tou te iloa o ia i Kalilaia,” Ona latou vave sosola ese ai lea mai le tuugamau ma le ofo tele.

Tamaiti, na maliu Iesu mo le faamagaloina o agasala a tagata uma, lea ua toe tu manumalo mai le oti ma le tuugamau.

GALUEGA FAATINO: Valivaligā Ata

Ia fai ni kopi o le ata e tufa i le vasega e galulue ai.

PESE: God is not dead/E lē o maliu le Alii

A’OA’OGA:

1. Ua toe tu Iesu mai le oti ma le tuugamau.
2. Na maliu Iesu e faamagalo ai tagata agasala.

ASO SA: 19 APERILA 2020

MATAUPU: UA TOE OLA LE AFAFINE O LE PULE O LE SUNAKO

SINI: Ia malamalama le vasega, na toe faaola e Iesu le afafine o le pule o le sunako.

TUSI FAITAU: Mareko 5: 35 – 43 (mo le Faiaoga)
Mareko 5: 41 (mo le Vasega)

Ona tago ifo lea o ia i le lima o le teine, ma fetalai atu ia te ia. “Talita kumi,” o lona faamatalaga leni, “Funa e, ou te fai atu ia te oe, ia e tula’i.”

FESOASOANI MO FAIAOGA:

Ua o mai tagata mai le aiga o le pule o le sunako e ta’u i ai, ua oti lona afafine i le ma’i, ae ‘aua le toe faalavelaveina le a’oa’o o Iesu i lana galuega.

Ua faalogo atu i ai Iesu, ona fetalai atu lea i le pule o le sunako, “‘Aua e te mata’u; tau lava ina e faatuatua.” Ua o atu i totonu o le fale Iesu, Peteru, Iakopo, Ioane ma matua o le teine. Ua tulia e Iesu tagata uma na i ai i fafo. Ua Ia fetalai atu foi i ē na fetagisi, “E le o oti le teine ua na ona moe.”

Ua oo atu i latou i le mea o taoto ai le teine ona fetalai atu lea o Iesu iā te ia, “Talita kumi,” o lona uiga, Funa e, ou te fai atu ia te oe, ia e tula’i. Ona tu lea i luga o le teine, ua savali. E sefulu ma le lua tausaga o le teine. Ua ofo uma tagata na i ai, auā ua toe ola le teine na oti.

Tamaiti o le faatuatua o le tamā o le teine iā Iesu, na toe ola ai lona afafine na oti.

GALUEGA FAATINO: Valivaligā Ata

Ia fai ni kopi o le ata ua saunia e tufa i le vasega e galulue ai.

PESE:	O lima o Iesu o lima agalelei E alofa ai i tagata uma E faamalolo i tagata mama’i Ma faamanuia i tamaiti	Jesus hands were kind hands Doing good to all Healing pain and sickness Blessing children small
	O nai ona lima e auauna atu E tali i lau valaau O lima o Iesu, o lima agalelei E alofa ai i tagata uma.	Washing tired feet And saving those who fall Jesus hands were kind hands Doing good to all

A’OA’OGA:

1. Na toe faaola e Iesu le afafine o le pule o le sunako
2. Ia tatou usitai ma talitonu ia Iesu.

ASO SA: 26 APERILA 2020

MATAUPU: O MARIA MA MARETA

SINI: Ia malamalama le vasega, e finagalo Iesu e faamuamua mea tau i le Atua i totonu o aiga.

TUSI FAITAU: Luka 10: 38 – 42 (mo le Faiaoga)
Luka 10: 41 (mo le Vasega)

..... *Mareta e, Mareta e, ua e popole ma ua pupū lou loto i mea e tele.*

FESOASOANI MO FAIAOGA:

I se tasi aso, na afe ane ai Iesu e fai sina mapu ma malolo i le fale o Maria ma Mareta i le nuu o Petania. Sa matauina ai e Iesu le pisi tele o Mareta i le tapenaina o le fale ma sauniuni mea uma, auā le taliina o le la malo ua afe atu o Iesu. A o Maria, ua nofo lelei i lalo i tafatafa o ona aao, ma faalogologo i ana fetalaiga ma a’oa’oga. Na tupu le lē fiafia o Mareta, ona na ia saunia uma mea uma, e pei o le teuina o le potu ma moega e malolo ai le Alii, ma le kukaina o meaai auā se taumafataga a Iesu.

A o Maria lona uso, ua lē fesoasoani atu iā te ia, ae na ona nofonofo lava i tafatafa o Iesu. Na i’u ina tigā tele Mareta, ma ua lē lava lona onosai, ma fai atu loa iā Iesu e fai ane iā Maria, e alu ane sei fesoasoani atu iā te ia. Peitai, ua tali atu i ai Iesu, ua popole ma pupū lona loto i mea e tele, ae ua filifili e Maria le mea lelei ma le tāua, o le fia faalogologo lea i upu lelei ma a’oa’oga tāua tau i le malo o le Atua. E peiseaī ua fetalai atu Iesu iā Mareta, ia faamuamua mea e tataua ona faamuamua.

Tamaiti, ua a’oa’o mai Iesu iā i tatou e pei ona ia faia iā Mareta, e lē aogā le faatāua ma faamuamua isi mea o le olaga nei, ae tataua pea ona faamuamua le Atua i mea uma e manuia ai le olaga.

GALUEGA FAATINO: Valivaligā Ata

Ia fai ni kopi o le ata ua saunia e tufa i le vasega e galulue ai.

PESE: Seek ye first the kingdom of God
And His righteousness
And all these things
Shall be added unto you
A-le-lu Aleluia,

Saili muamua le malo o le Atua
Ma lona amiotonu
Ona faaopoopoina lea ia te oe
O mea uma Aleluia

A’OA’OGA:

1. Ia faamuamua le Atua i mea uma.
2. O Maria ma Mareta, o uo a Iesu.
3. Ia to'aga e faalogo i tala iā Iesu.

MANATU TAIALA O ME: O LE ALOFA FAA-TINĀ

Ua filifilia le manatu taiala e pei ona tā'ua i luga e fa'aautū i ai mataupu o lenei masina, ina ia a'oa'oina ai le fanau i le uiga o le alofa faa-tinā.

ASO SA: 3 ME 2020

MATAUPU: O LE ALOFA FAATINĀ O IOKAPETA

SINI: Ia malamalama le vasega, i le alofa faa-tinā o Iokapeta.

TUSI FAITAU: Esoto 2: 1 – 8 (mo le Faiaoga)
Esoto 2: 3 (mo le Vasega)

Ua lē toe mafai ona nā ia te ia, ona ia ave lea mo ia o le ato kome, na ia puluti ai i le pulu emeri, ma le pulu safeta, na ia tuu ai le tama, ona tuuina ai lea i le vao utuutu i le auvai o le vaitafe.

FESOASOANI MO FAIAOGA:

O Amaramo ma lona toalua o Iokapeta, o tagata o sã Levi i le nuu o Isaraelu (Esoto 6: 20). Na fanau e Iokapeta se tama tane i le taimi o le tulafono a le tupu o Aikupito o Farao, a fanau mai se tama teine, ona faaola lea, ae a fanau mai se tama tane, ia 'aua nei faaolaina.

Sa tausī ma nanā e Iokapeta si ana tama, seia oo atu i le tolu masina, ua lē toe mafai ona nanā o ia, auā ua leo tele le tagi a le tama. Na iloa lelei e Iokapeta, e maua lava e se tasi si ana tama. O le mea la lea na ia faia, e faasaoina mai ai o ia: Ua ia lalagaina se ato kome, ma faapulu i le pulu emeri ma le pulu safeta, ina ia aua nei sao atu se vai i totonu o le ato. Ua fofola foi le ie, ma tu'u ai loa i totonu le tama, ma ua tu'u i le vao 'utu'utu i le auvai o le vaitafe e faatafetafea ai, a o va'ava'ai atu i ai si ona tuafafine o Miriama.

Ua o mai nei le ta'elega a le afafine o Farao ma ana auauna teine i le vai, ma latou mauaina ai le ato o tafetafea atu. Ua tatala nei le ato, ma maua ai se pepe aulelei tele. Ua tagi le tama, ona alofa lea i ai o le afafine o Farao ma faapea ana tala, e pei lava o se tamaitiiti Eperu lenei. Ona fai atu lea o Miriama iā te ia, pe o le a alu e su'e mai se fafine Eperu na te tausīa le tama mo ia. Na momo'e le teine o Miriama i lona tinā, ina ia sau vave, o loo mana'o le afafine o Farao i se fafine na te tausīa le pepe mo ia. Ua sau Iokapeta, ona fai atu lea o le afafine o Farao iā te ia, "Ia e ave lenei tama ma e tausī mo a'u." Ua ia faaigoa le tama iā Mose, auā o le tama na ia toina a'e nai le vai.

Tamaiti, o le alofa faa-tinā o Iokapeta i si ana tama, atoa ai ma le alofa faaola o le Atua, na ala ai ona faasaoina le pepe o Mose.

Uiga o Upu:

- i) vao utuutu - o le vao e tutupu ma ola i faaputuga i se vai
- ii) puluti - momono po o le faapipii, faatumu avanoa

GALUEGA FAATINO: Valivaligā Ata

Ia fai ni kopi o le ata ua saunia ma tufa i le vasega e galulue ai.

PESE: 1. Iokapeta le tinā loto tele
Na ia lalaga le ato kome mo si ana pepe
Ina ia faasaoina ai o ia
Le tulafono a Farao e matautia

Tali: O pulu emeri ma le safeta na puluti ai
Ina ia 'aua nei sao atu i ai o se vai
Talofa i le tama ua tagitagi mai
I totonu o le ato kome na ia fai.

2. A o tafetafea atu o ia
I totonu o le vai o le Naila
A o tu mamao atu ma le maligi o loimata
Ia si ona tuafafine o Miriama

3. Le afafine o Farao ma lana galu teine
Na o ifo i le vai e taele
Ma ua latou mauaina ai le pepe
Mana'o loa e tausi mo ia i aso e tele.

(Fati: E leai sa'u siliva po o se auro)

A'OA'OGA:

- 1. Na lalaga e Iokapeta le ato kome e faasaoina ai lana pepe.
- 2. O le alofa o le Atua na faasaoina ai Mose.

ASO SA: 10 ME 2020 (ASO SA O TINĀ)

MATAUPU: O MARIA MA LE FAGU ALAPASA

SINI: Ia malamalama le vasega, i le galuega lelei na faia e Maria iā Iesu.

TUSI FAITAU: Mataio 26:6-13 (mo le Faiaoga)
Mataio 26:7 (mo le Vasega)

Ona sau ai lea ia te ia o le fafine ma le fagu alapasa ua i ai le suauu manogi tau tele, ona liligi ai lea e ia i lona ao a o taoto ia e taumafa.

FESOASOANI MO FAIAOGA:

Sa i Petania Iesu ma ona so'o i le fale o Simona le lepela. O iina sa faia ai se latou aiga tele, a o lumana'i le aso e fai ai le tausamiga o le paseka i Ierusalema.

Ona sau ai lea o Maria ma le fagu alapasa o loo i ai le suauu manogi tau tele, ma liligi i le ao o le Alii o Iesu a o taoto Ia e taumafa. Ua sasala foi le manogi o le uu i totonu o le fale. Ona fai ane lea o le auso'o ia Iesu, pe aisea ua faamaumau ai le u'u manogi, a e le ave e faatau ma avatu ai i e matitiva. A ua tali ane Iesu, ina ia 'aua le faalavelave i le mea ua faia e lea tinā, o le mea lelei ua ia faia. Auā o le mea ua ia faia, e fai ma faata'imuaga o lona tanuga, auā latou te nonofo pea ma e matitiva, ae latou te lē nonofo pea ma Ia. O le uiga o le saunoaga po le fetalaiga a Iesu, o le galuega lelei ua faia e lea tinā e ala i lana fagu suauu taugata ua foa'iina mo Ia, ua fai ma amataga o lona maliu, auā o le taimi tonu lea ua sauni ai le Alii o Iesu e maliu i le satauro ma tanu i le tuugamau.

Tamaiti, ua ta'u mai i lenei tala le fai mea lelei o lenei tinā. O le suau'u taugatā e maua ai ana tupe e tele pe a faatau atu, a o lea ua ia foa'iina e u'u ai le ao o Iesu.

Uiga o Upu:

i) faata'imuaga: faamuamua, ta'imua

GALUEGA FAATINO: Valivaligā Ata

Ia fai ni kopi o le ata ua saunia ma tufa i le vasega e galulue ai.

PESE: Ioe, ou te alofa i le tagata Kalilaia
Oh! Yes I love this man of Galillee

Ioe, ou te alofa, i le tagata Kalilaia x 2
Ioe, ou te alofa i le tagata na maliu mo a'u
Ioe, ou te alofa i le tagata Kalilaia

Oh, Yes, I love this man of Galillee x 2
Oh, Yes, I love this man who died for me
Oh, Yes I love this man of Galillee

A'OA'OGA:

1. E fiafia le Atua i so o se isi e fai mea lelei mo Ia.
2. Ia tatou fiafia e fai mea lelei mo isi

3. Ua u'u e Maria le ao o Iesu i le suau'u manogi

MATAUPU: O LOIMATA ALOFA O AKARA

SINI: Ia malamalama le vasega, na faafofoga le Atua i le tagi a Akara.

TUSI FAITAU: Kenese 21: 8 – 21 (mo le Faiaoga)
Kenese 21: 16 (mo le Vasega)

Ua ia nofo mai foi, ma tagi leo tele lava.

FESOASOANI MO FAIAOGA:

O Akara, o le fafine Aikupito. O le auauna fafine a Sara, le toalua o Aperamo. Sa talia e Aperamo le tonu a Sara; ma ua fanau ai e Akara se tama tane, ma faaigoa iā te ia o Isamaeli

Ua taunuu le finagalo o le Atua iā Sara, ma na ia fanau ai se tama tane, ma faaigoa iā te ia o Isaako. Peitai, ua lē fiafia Sara i lona vaai atu, ua alofa tele Aperamo i le tama a Akara. Ona fai atu lea o Sara iā Aperamo, e tuli ese Akara ma lana tama ma lo latou aiga, auā o i latou o auauna, ma e le tutusa Isamaeli le tama a le fafine pologa, ma lana tama o Isaako.

E ui ina tigā ma faigatā, ae sa usita'i Aperamo e tusa ma le mana'o o Sara. Ua tuliese Akara ma lana tama o Isamaeli. Ua taunuu atu i la'ua i le vao o Peresepa, ua uma meaaai ma le fagu vai, ma ua lagona foi e i la'ua le vaivai. Ona tuu lea e Akara o lana tama i lalo ifo o le tasi laau, ae ua alu ma tu mamao mai i le isi itū o le vao, auā ua ia faapea ane, "E 'aua ne'i ou vaai i le oti o le tama." Ona nofo ai lea o Akara i lalo, ma ua tagi leo tele lava. Ua maligi ona loimata, auā i lona manatu, ua leai se faamoemoe, o le a oo mai le oti iā te ia ma si ana tama.

Na faafogaina e le Atua le tagi a Akara. Ua valaau mai le agelu a le Atua iā Akara mai le lagi, "Aua e te fefe, auā ua faafogaina e le Atua le leo o le tama i le mea o i ai o ia." Ona faapupulaina lea e le Atua o mata o Akara, ma ua na iloa atu ai le vaieli. Ua ia alu atu ma utu ai le fagu pa'u, ma faainu ai lana tama o Isamaeli. O le alofa faa-tinā o Akara mo Isamaeli, na fa'aalia i le maligi o ona loimata, ma lona tagi leo tele i le Atua.

GALUEGA FAATINO: Valivaligā Ata

Ia fai ni kopi o le ata ua saunia ma tufa i le vasega e galulue ai.

PESE: Lo'u tinā, ou te alofa iā te oe x 2
Tigā le faigatā, e te onosa'i pea
Lo'u tinā, ou te alofa iā te oe.

A'OA'OGA:

1. Ua tagi leo tele Akara ona o le alofa
2. Ua faafofoga le Atua i le tagi a Akara
3. Ia faamoemoe i le Atua i taimi faigata.

ASO SA: 31 ME 2020

MATAUPU: O IESU MA LE FAFINE ELENİ

SINI: Ia malamalama le vasega, o le fetalaiga a Iesu na malolo ai le ma'i a le tama o le fafine Eleni.

TUSI FAITAU: Mareko 7: 24 – 31 (Mo le Faiaoga)
Mareko 7: 29 (Mo le vasega)

Ona fetalai atu ai lea o ia ia te ia, "Ina alu ia ona o lau upu lena; ua te'a le temoni sa i totonu i lau tama teine."

FESOASOANI MO FAIAOGA:

Ua malū a'e Iesu i le laueleele o Turo ma Saitonu, ua ia taumafai ina ia ulu faalilolilo i le fale. Peita'i e le'i mafai ona lilo o Ia i le fafine Eleni, aua o lo o naunau lava e fia feiloa'i ia Iesu, aua ua ia faalogo i le tala i le tele o vavega na faia e Iesu, ona o lana tama teine ua ulugia e temoni,

Ua faate'ia Iesu i le ulufale mai o le fafine. Ua faapa'u i ona vae, ma ua ia faatoga atu ia Iesu ina ia alofa ma tulia ese le temoni o lo o i totonu o lana tama teine. Ua vaai atu Iesu, o le fafine o nuu ese lenei fafine, ona ia tali lea i se tali e tofotofoina ai lenei fafine. Ua ia fetalai atu i le fafine, "Se'ia lua'i maona le fanau, aua e le tatau ona ave mea ai a fanau ma lafo i uli. Ona tali mai ai lea o le fafine ia te ia, "Le Alii e, e moni a oe, ae ui i lea, o uli i lalo o le la'o'ai, e aai i latou i momoi mea a tama."

Ua faafofoga atu Iesu i le tali a le fafine, ua ia silafia ai lona faatuatua. Ona Ia fetalai atu lea i le fafine, "Ina alu ia, ona o lau upu lea ua te'a ai le temoni sa i lau tama.

O le uiga o le fetalaiga tuusa'o a Iesu i le fafine Eleni, o le faaolataga ua saunia, ua na o tagata Iutaia lava, aua e iloa ona ava ma matata'u i le Atua, ma e le faasoaina atu mo tagata o nuu ese, lea ua faaupuina o uli. Peitai, ua tali le fafine i se tali e ofo ai Iesu. "Le Alii e, e moni a oe, ae ui i lea o uli i lalo o le la'o'ai, e aa ii latou i momoi mea a tama." O lona uiga, o le tali a le fafine, na te matua talia le saunoaga a Iesu, a o lona manatu, tau lava o sina upu itiiti ia pa'u mai i fofoga o le Alii, ua lava lea ma totoe e ola ma malolo ai o le ma'i o lana tama. Ona alu ai lea o ia i lona fale, ua maua atu lana tama teine o taoto ma ii luga o le moega, ua te'a fo'i le temoni sa ia te ia.

Uuga o Upu:

Momoi mea: meaa i e to'ulu ifo i lalo o laulau pe a aai

Nuu ese: nuu eleai se piitaga ia Isaraelu; ese atua e tapua'i i ai

Faatoga: faamalie, aoi

Temoni: agaga leaga

GALUEGA FAATINO: Faatino le Tala

Ia faatino e le vasega le tala e pei ona saunia i le mataupu

PESE: O lima o Iesu o lima agalelei/Jesus hands were kind hans

A'OA'OGA: 1. Na faamalolo e Iesu le ma'i o le tama a le fafine Eleni.

2. E alofa Iesu i tagata uma

MANATU TAIALA O IUNI: FAI MA FAATAITAIGA LELEI.

O mataupu o leni masina, o loo faaautu lava i le manatu ta'iala e pei ona taua i luga, "Fai ma faataitaiga lelei". E toe faamanatu i fanau a le Ekalesia le amio ia lelei ma faaaloalo, ma ia o faatasi ma le fiafia e fesoota'i i le Alii e ala i le tatalo. Ia avea i latou e fai ma fetu pupula ina ia faataitai mai ai nisi fanau, e ala i a latou amio ia lelei.

ASO SA: 7 IUNI 2020.

MATAUPU: UA USITAI SAULO I LONA TAMĀ.

SINI: Ia malamalama le vasega na usita'i Saulo i le faatonuga a lona tamā.

TUSI FAITAU: 1 Samuelu 9:1-3 (faiaoga)
1 Samuelu 9:3 (vasega)

Ua le iloa asini a Kiso le tamā o Saulo; ona fai mai lea o Kiso i lona atalii o Saulo, Ina o ia oulua ma se tasi taulealea, tula'i ia, ma alu e saili asini.

FESOASOANI MO FAIAOGA:

O le toeaia o Kiso, e sau mai i le isi ituaiga o Isaraelu, o Peniamina. O le tagata e tupuga mai i se aiga mauoa. Sa ia te ia le lafumanu, faatasi ma asini. O lona atalii o le tama umi toe aulelei o Saulo, ma sa sili lona aulelei i tagata uma o le fanauga a Isaraelu i lea vaiata.

O le tasi aso na le iloa ai asini a le toeaia o Kiso, ona ia faatonuina ai lea o lona atalii o Saulo, ina ia o ma se taulealea ina ia saili mai asini ma faafoi mai. Sa usita'i le tama o Saulo i le faatonuga a lona tamā, ina ia alu e saili mai asini ua le iloa. O le saili o manu ua le iloa, e le o se galuega e faigofie, ona o le tele o faafitauli e faafeagai, faapei o nisi o manufeai i le vao, aemaise o nisi o tagata faomea ma gaoi e lalafi solo i le togāvao. E lei mafaufau le tama o Saulo i ia faafitauli. Pau lava le mea, o lona usita'i e ala i lona tula'i ma faatino loa le faatonuga ua aumai.

O le faata'ita'iga lelei tele ua aumai i lenei tala, mo i tatou uma lava. O le a le faatonuga e tuuina mai e o tatou matua ma o tatou ta'ita'i, ia o tatou faalogo ma usita'i, ma faatino i le faamaoni.

GALUEGA FAATINO: Valivaligā Ata.

Fai ni kopi o le ata ua saunia, ma tufa i le vasega latou te valivaliina.

PESE: Ou te le faatali sei o'u matua.

A'OA'OGA:

1. E manuia le tagata e faalogo ma usita'i.
2. Fiafia e fai feau i le aiga ma soo se mea.

ASO SA: 14 IUNI 2020.

MATAUPU: FAASOA ATU I E MATITIVA

SINI: Ia malamalama le vasega i le tāua o le a'oa'o atu o Ioane i tagata.

TUSI FAITAU: Luka 3:10-11 (faiaoga)
Luka 3:11 (vasega)

Ua tali atu o Ia ia te i latou, "O le tagata e lua ona ofu tino, ia avane ia te ia e leai sona ofu. O lē ua ia te ia mea e ai, ia faapea foi ona fai"

FESOASOANI MO FAIAOGA:

Tamaiti! O ai foi na papatisoina Iesu? Ioe! O Ioane le papatiso i le vaiata o Ioritana. O le mataupu o lenei aso Sa, o le a tatou talanoa ai i nisi o vaega tāua o le ola e tatau mo tagata uma i le olaga o aso ta'itasi, e pei ona a'oa'o atu ai Ioane le Papatiso i le motu o tagata na o ane ia te ia.

Sa faatino e Ioane lana galuega, o le papatisoina lea o tagata i le vaiatafe o Ioritana. O le faamoemoe, ina ia salamo tagata, ma aua nei toe faia le olaga tuai. Sa ia a'oa'o atu foi i tagata i itu uma o le vaiatafe o Ioritana. E faamamafa i lana a'oa'o atu, le tataua lea i tagata uma ona omai ia te ia ina ia papatisoina.

O nisi o tagata ua latou tetee i le a'oa'o atu a Ioane. A o nisi o tagata ua o latou fesili ia Ioane, po o le a se amio po o se mea e tataua ona o latou faia ina ia manuia ai o latou olaga. Ona tali atu ai lea o Ioane, i nisi o amioga lelei e tataua ona ola ai le tagata, aemaise lava i le va o le tagata mauoa ma le tagata mativa. E tataua i le tagata o lo o maua ana oloa, ona alofa atu ma faasoa atu i le tagata o lo o fia maua le fesoasoani.

E ese le tāua o le a'oa'o atu a Ioane le papatiso. Leaga e faapea foi le siosiomaga o lo o tatou ola ai i aso uma. E tele lava ina tatou lē alolofa ia i latou e matitiva ma leai ni meaai. O le to'atele foi o tagata, e lē fia uo i tagata mama'i ma tagata matitiva. O le mea na e ta'u o le manatu faapito, ma le vaai maulalo. O le fautuaga a Ioane, ina ia aua ne i ola faapena le tagata.

GALUEGA FAATINO: VALIVALIGĀ ATA

PESE: Alofa o se mea e te faasoa atu.

A'OA'OGA:

1. Faalogo i a'oa'oga lelei ma ola ai.
2. Ia fai ma faata'ita'iga lelei mo isi tagata.

ASO SA: 21 IUNI 2020

MATAUPU: UA ALOFA IONATANA IA TAVITA.

SINI: Ia malamalama le vasega i le mafuaaga ua alofa ai Ionatana ia Tavita.

TUSI FAITAU: 1 Samuelu 19:1-3 (faiaoga)
1 Samuelu 19:1e (vasega)

A o Ionatana le atalii o Saulo, sa tele lava lona alofa ia Tavita.

FESOASOANI MO FAIAOGA:

O le ita tele o le tupu o Saulo ia Tavita, o lea na ia faatonuina ai lona atalii o Ionatana faatasi ma ana auauna, ina ia o latou faaoo le oti ia Tavita. O le taimi lea, o loo avea ai Saulo ma tupu o Isaraelu. Na mafua ona ita Saulo ia Tavita, ona ua iloa e Saulo, ua to'atele tagata ua o latou fiafia ia Tavita nai lo o ia le tupu. Ona ia taumafai ai lea e saili se auala, ina ia fasiotia ai le tama o Tavita. A o Tavita, sa ia te ia le Agaga o le Alii.

Ua sauni auuuna a Saulo ina ia faaoo le oti ia Tavita. Ona alu ai lea o Ionatana le atalii o Saulo, ua faamatala ia Tavita, o lo o mana'o lona tamā ina ia faaoo le oti ia te ia. E tatau ia te ia ona alu ina ia saili se mea lilo e lafi ai. O le alofa o Ionatana i si ana uo o Tavita, ina nei afaina i le mana'o o lona tamā o Saulo. A o Tavita, e leai sana agasala po o sana agaleaga sa faia ia Saulo le tupu. Ua na o lona usita'i lava i faatonuga uma a le tupu, tusa lava po o le a le faigata, e usita'i lava ma faatino.

GALUEGA FAATINO: Valivaligā Ata.

Saili se ata o le mataupu pe faaaoga le ata o loo auina atu i le tusi, e fai ni kopi ma tufa i le vasega mo le valivaliina.

PESE: O Iesu e alofa i tamaiti (Jesus loves the little children)

A'OA'OGA:

1. Ia alofa i au uo.
2. E lē lelei le ola taulamalama.

ASO SA: 28 IUNI 2020.

MATAUPU: UA FAAFETAI IONA I LE ATUA.

SINI: Ia malamalama le vasega i le mafuaaga ua faafetai ai Iona i le Atua.

TUSI FAITAU: Iona 2: 3 – 9 (mo le Faiaoga)
Iona 2: 9 (mo le Vasega)

A o a'u, ou te faitaulaga ia te oe ma le upu faafetai. Ou te faia le mea na ou tauto ai. Mai le Alii le olataga.

FESOASOANI MO FAIAOGA:

O ai foi na folo e le i'a? O Iona. Aiseā na folo ai e le i'a Iona? Ona ua le usita'i i le faatonuga a le Atua ina alu e ave le tala i Nineva, ae alu atu sola i Tasesa.

O le mataupu la o lenei aso Sa, o se vaega o le tatalo a Iona i le Atua, a'o i ai i totonu o le manava o le i'a. Na saunia e le Atua le i'a tele lava, e na te foloina le tama o Iona, ina ua lafoina i le sami. Sa lagona e Iona lona fefe ma lona popole i le mea ua tupu ia te ia. Ua iloa e Iona o lo o saogalemu o ia ma o lo o faasaoina o ia i totonu o le manava o le i'a, o lea na ia tatalo ai loa i le Atua. Ua ia lagona lona faatauva ma lona lotomaulalo i luma o le Atua. Ua ia faatoese i lona le usita'i ma lona le anana i le faatonuga a le Atua na tuuina atu ia te ia.

Ae o le faaiuga lava o le tatalo a Iona, o lo o faapea ai ana upu, “A o a’u, ou te faitaulaga ia te oe ma le upu faafetai”. Pau lava lea o le mana’o o Iona o lo o totoe i Iona loto pe afai ae faasaoina o ia mai le manava o le i’a. O le faitaulaga i le Atua ma le upu faafetai.

Ua a’oa’o mai le mataupu o lenei aso Sa, ina ia o tatou iloa ona faafetai i le Atua ma le loto faamaoni, ona o Iona alofa mo i tatou i aso uma. O le alofa lava o le Atua, e faasaoina ai i tatou, pe a o tatou faafeagai ma faigata o le ola.

GALUEGA FAATINO: Valivaligā Ata.

PESE: IONA I LE MANAVA O LE I’A.
Iona, Iona, Iona, Iona
Iona i le manava o le i’a
Iona, Iona, Iona, Iona
Iona i le manava o le i’a
Iona, Iona, Iona, Iona
Iona i le manava o le i’a
Iona i le manava x2
O le i’a.

A’OA’OGA:

1. Ia fiafia e faafetai i le Atua i aso uma.
2. Ia lagona le loto mualalo i luma o le Atua.

MANATU TAIALA O IULAI: O TAMAITI O LE TUSI PAIA

Ua filifilia lenei manatu taiala mo lenei masina, ina ia malamalama tamaiti o nisi valaauina o le tagata e amata mailava i le laitiiti.

ASO SA: 5 IULAI 2020

MATAUPU: O IEREMIA LE PEROFETA

SINI: Ia malamalama tamaiti e pule le Atua le fa’aaogaina o le tagata.

TUSI FAITAU: Ieremia 1: 4 - 10 (mo le Faiaoga)
Ieremia 1: 5 (mo le Vasega)

Na au iloa oe a o lei faia oe e au i le manava, na au faapaiaina oe, a o lei fanau mai oe, na ou tofia oe e fai ma Perofeta i nuu.

FESOASOANI MO FAIAOGA:

O Ieremia o le Perofeta laitiiti. O le atalii o Hilikia o le tasi o le au Ositaulaga.

Sa fetalai le Atua ia Ieremia ma faailoa ia te ia, ua leva ona ia valaauina o ia. E lei iloa e Ieremia lea finagalo o le Atua. Ua faapea mai le Atua, “Na au iloa oe a o lei faia oe e au i le manava, na ou faapaiaina oe a o lei fanau mai oe, na au tofia oe e fai ma perofeta i nuu.”

Tamaiti, e le’i faigofie ia Ieremia ona talia lea valaau. Sa ia faailoa atu i le Atua, e lē iloa e ia ona tautala, o ia ua na o se tamaitiiti. Peitai sa faamalosi ma faalototele pea i ai le Atua. Ia sauni i lona valaauina e faatasi pea o Ia ma ia, i mea uma o le a auina atu i ai, ma mea uma foi e ta’u mai e le Atua e fai.

Sa faailoa atu pea i ai e le Atua e aua le fefe. O le a ia lavea’i ma faatasi pea ma ia. Ona faaloaloa ai lea o le aao o le Atua ma pa’i atu i le gutu o Ieremia ma faapea atu, “*Faauta ou te tuuina atu a’u upu i lou gutu.*”

O le Perofeta o Ieremia o se tasi Perofeta iloga o le Tusi Paia. Tamaiti e faatasi le Atua ma le tagata ua Ia valaauina mo se galuega ua Ia finagalo i ai.

Uiga o Upu:

i) Perofeta - faifeau

GALUEGA FAATINO: Matamata ata ma le pese

1. Fai ni kopi o le ata ua saunia atu, ave e matamata ai tamaiti.

PESE: A’o le pese ua saunia atu e mafai ona faaopoopo nisi fuaiupu. Fai ni taga o le pese.

O IEREMIA

1. O Ieremia, o Ieremia
O le atalii o Hilikia
O le tama Peniaminā
O le Perofeta na vave filifilia

O Ieremia, o Ieremia

(fati – Ivi mamago)

A’OA’OGA FOU:

1. Faamoemoe i le Atua e maua ai le lototele.
2. Na usita’i Ieremia i le Atua.

ASO SA: 12 IULAI 2020

MATAUPU: O IOASA LE TUPU LAITIITI

SINI: Ia malamalama le vasega na mafai ona avea tamaiti ma tupu.

TUSI FAITAU: 2 Tupu 12: 1 – 16 (mo le Faiaoga)
2 Tupu 12: 2 (mo le Vasega)

Ua faia foi e Ioasa le amiotonu i luma o le Alii i ona aso uma na a’oa’o atu ai Ieoiata le ositaulaga ia te ia.

FESOASOANI MO FAIAOGA:

O le fitu o tausaga o Ioasa na avea ai ma tupu o Isaraelu.

O Ioasa o le atalii o le tupu o Aasaia. Ua na o ia foi o le fanau ua mafai ona ola mai. O Ioasa na tele ina nofo i le ositaulaga (faifeau) o Ieoiata ma lona toalua o Iosapa.

Sa tausia ma a’oa’oina o ia. E toaga i le lotu ma fai feau a le faifeau. E oo lava ina avea ma tupu o lo o nofo ai pea ma usita’i ia Ieoiata. Sa galulue faatasi i laua i le faiga o le faaleleiga o le malumalu.

Sa avea o ia o se tupu lelei ma faamaopoopo taulaga ina ia fa’aaoga lelei mo le atinaeina o le galuega. O lona uiga la tamaiti e fa’aaogaina i tatou e le Atua mai lo tatou olaga laiti ma oo ina avea ma tagata matutua. E ta’u mai foi le lelei o le faalogo ma usita’i i faifeau ia ma o tatou matua.

E mafai foi ona tā’ua ma avea o tatou faifeau ma latou faletua o tinā ma tamā, e alolofa ma fesoasoani ia i tatou. Ia tatou usita’i ma faalogo e manuia ai o tatou olaga.

GALUEGA FAATINO:

1. Fai ni kopi o le ata o lo o i le tusi aoga.
2. Ia tofu le tamaitiiti ma le kopi.
3. Faataitai ona tusi le fuaiupu o lo o i ai i le ata. O Ioasa le tupu laitiiti.

PESE: O au o le T
O au o le T A M A I T I I T I
Ua i ai K E R I S O
I lou A G A G A
O le a ou ola ai e F A A V A V A U

A'OA'OGA:

1. Ia fai i tatou ma tama ma teine usita'i, e faataitai i ai isi au uo.
2. A tatou usita'i o laiti e mafai ona avea i tatou ma tagata lelei pe a matutua.

ASO SA: 19 IULAI 2020

MATAUPU: O TANIELU LE TAMA LOTOMAU

SINI: Ia malamalama tamaiti, ia tumau lo tatou talitonu ma faatuatua i le Atua.

TUSI FAITAU: Tanielu 6: 18 – 28 (mo le Faiaoga)
Tanielu 6: 21 – 22 (mo le Vasega)

Le tupu e, ia soifua oe e faavavau ua auina mai e lo'u Atua o lana agelu, ua punitia ai gutu e leona, ua le afaina ai a'u; auā ua silafia e ia ua leai sa'u amio i ona luma; e leai foi se mea leaga ua a'u faia i ou luma, le tupu.

FESOASOANI MO FAIAOGA:

Tamaiti o ai foi lea na lafo i le lua (ana) o leona? Ioe o Tanielu.

Ia o le mataupu o lenei Aso Sa – O Tanielu le tama lotomau, o lona uiga. E tumau le talitonu o Tanielu i le Atua, e le mafai ona suia e le popole po o le a se mea e tupu, e tumau lava lona talitonu i le Atua.

Sa i ai le tupu o Tariu i le nuu lea e nofo ai Tanielu. O nisi o alii sili o le nuu ua latou fau se tulafono ina ia faaleagaina ai le tumau o Tanielu i le Atua. O le tulafono ia aua nei ole atu se isi i sona atua, ae na o le tupu e tataua ona faailoa i ai.

E le'i mafai e lea tulafono ona faavaivaia le talitonu o Tanielu i le Atua. Sa tatalo faatolu i le aso i lona Atua, le tupu o tupu.

Sa iloa e Tariu e le o usita'i Tanielu ia te ia. O lea sa faatonuina ai loa e lafo Tanielu i le lua o leona. E le'i fefe Tanielu ua lotomau pea.

E le'i mafai e leona (manu-feai) ona osofaia Tanielu aua ua taofi e le agelu a le Atua gutu o leona ina ia aua nei aia Tanielu le tama lotomau.

GALUEGA FAATINO: Faamatala le ata

1. Fai ni kopi o le ata ua saunia atu i le tusi aoga.
2. Ia vaai i ai tamaiti, ia taumafai e faamatatala mai le ata.

PESE: Pese o i le Tusi Pese a le Ekalesia – Pese 359

A’OA’OGA:

1. A lotomau pe tumau i le Atua e faasaoina lou ola.
2. E mafai e le Atua mea uma.
3. E leai se mea e faigata e le Atua.

ASO SA: 26 IULAI 2020

MATAUPU: O TIMOTEO LE ATALII O PAULO

SINI: Ia malamalama tamaiti, e maua manuia pe a faamaoni ma faalogo i le a’oa’o atu.

TUSI FAITAU: 1 Timoteo 1: 1 – 5 (mo le Faiaoga)
1 Timoteo 1: 2 (mo le Vasega)

Ia Timoteo lou lava atalii i le faatuatua: Ia ia te oe le alofa tunoa, ma le alofa, ma le manuia mai le Atua le Tamā, atoa ma Keriso Iesu lo tatou Alii.

FESOASOANI MO FAIAOGA:

O Timoteo sa ola mai i se aiga Kerisiano. O lona tamā o se tagata Eleni. O lona tinā o Eunike. Sa nonofo foi i latou ma Loi le tinā o lona tinā. Sa a’oa’oina lelei o ia i tala o le Tusi Paia e tinā nei. O se tama na lelei a’oa’oina mai totonu o lona aiga. Na oo lava ina mafuta ma le faifeau o Paulo. Sa faalogologo atili ai i tala o le Tusi Paia.

O ia o se tama usita’i ma sa fesoasoani foi i le faifeau. Sa a’oa’oina e Paulo i le galuega faafaifeau ma ua ia fiafia i ai. Sa oo lava ina galue o ia i se galulega faafaifeau i Efeso. E le se galuega faigofie. O lea sa tusi faamalosi atu i ai le Aposetolo o Paulo. Ua foliga lava o se atalii ua ia fiafia i ai ma ua pele i lona loto. Ua matua faamoemoeina lava e le faifeau o Paulo si ona atalii o Timoteo, auā o ia o se tama usita’i ma faalogo.

E faapena uma lava tatou. A lelei ma faalogo i le faifeau, e ta’u foi i tatou o atalii ma afafine o le faifeau po o se isi tagata matutua e iloa lou lelei ma usita’i. O lona uiga ua alolofa foi tatou ia Iesu lo tatou Alii Faaola.

GALUEGA FAATINO: Matamataga Ata

1. Fai ni kopi o le ata o lo o i le tusi aoga e faamatamata ai tamaiti ma ave ma latou.

PESE: “E leai se mea e le mafai i le Atua

E leai se mea e le mafai, pe a faatuatua i le Atua	Nothing is impossible
E leai se mea e le mafai	When you put your trust in God
Pe a e faatuatua i lana Upu	Nothing is impossible
Faalogo ia ao fetalai	When your trusting in his word
E i ai se mea e le mafai	Listen to the Voice of God to thee
Ia faatuatua i le Atua	Is ther anything too hard for me
Ma lana Upu Paia	Then put your trust in God alone
So o se mea so o se mea uma	And rest upon his word
Ioe! E mafaia mea i le Atua	For everything, Oh everything
	Yes! Everything is possible with God

A’OA’OGA:

1. Ia tatou faalogo ma usita’i i le faifeau ma o tatou matua e avea ai i tatou o ni tagata lelei i le lumanai.
2. Toaga i le aoga Aso Sa e a’oa’oina ai ma tatou iloa ai tala o le Tusi Paia.

MANATU TA’IALA O AOKUSO: O LE TĀUA O TAMĀ

O le masina lenei i le kalena o lo o faatāua ai tamā ma lo latou sao i totonu o aiga, ma soo se mea. O le lagona alofa ma le manatua pea o nai tamā, o le autu lea o mataupu o lenei masina mo le fanau. Ia saga a’oa’oina pea fanau ina ia o latou lagonaina le sao tāua o nai o latou tamā, faapei o le Atua ia i tatou uma.

ASO SA 2 AOKUSO 2020

MATAUPU: UA FAI MOSE MA LAVEA’I.

SINI: Ia malamalama le vasega i le mafuaaga ua fai ai Mose ma lavea’i i le fanau teine a le ositaulaga Mitiana.

TUSI FAITAU: Esoto 2: 16 – 17 (mo le Faiaoga)
Esoto 2: 17 (mo le Vasega)

A ua o mai leoleo mamoe, ma tutuli ia te i latou; ona tula’i lea o Mose ma lavea’i ia te i latou, ma faainu lo latou lafu mamoe.

FESOASOANI MO FAIAOGA:

Sa nofo Mose i le vaieli i le nuu o Mitiana. A o le vaieli lea, e fai mo tagata fai lafumanu e faafeinu ai a latou manu e pei o povi, o asini, o mamoe, ma isi manu faapena.

O le tasi o aso, na o atu ai afafine e to'afitu a le ositaulaga Mitiana, e utu a latou vai ma faafeinu le lafumanu a lo latou tamā, i le vai eli. Na faate'ia nei tama'ita'i i le laga atu o isi leoleo mamoe, ma tutuli ese i latou. A o le nofoaga tonu lava lea o lo o nofonofo ai Mose ma malolo ai. Sa tupu a'e i le loto o Mose lona alofa i tama'ita'i, ona o le fia sifi ma le fia malolosi o ia leoleo mamoe. O le mafuaaga la lena o lona tamo'e atu loa, ma lavea'i nei tama'ita'i, ina ua ia tutuli ese isi leoleo mamoe fia malolosi, ma faafeinu mamoe na o atu ma tama'ita'i. Ua fiafia nei tama'ita'i, ua o atu foi i lo latou tamā, ma faamatala i ai le mea na tupu.

O le a le mea na tupu? Ua lavea'i i latou e Mose.

GALUEGA FAATINO. Faaigoa le ata ma toe faamatala.

Tufa ata o le mataupu i le vasega e galulue ai.

PESE.

E mana'o Iesu, i le fealofani
Ia mafuta ma femulumulua'i.
Aua le fevaevaea'i, poo le fetuatuana'i
O Iesu, lo ta puni matagi.

A'OA'OGA.

1. Alofa i tagata uma.
2. Aua le fia sili.
3. Faatupu le filemu.

ASO SA 9 AOKUSO 2020. (ASO SA O TAMĀ)

MATAUPU: UA FAAMANUIA IAKOPO I LANA FANAU.

SINI: Ia malamalama le vasega i le tāua o le faamanuia atu a le tamā i lana fanau.

TUSI FAITAU: Kenese 49: 1- 2, 28 (mo le Faiaoga)
Kenese 49: 28 (mo le Vasega)

O i latou nei, o itu aiga e sefulu ma le lua o Isaraelu,.....ua ia faamanuia ai foi i latou, e taito'atasi ma lona manuia ua ia faamanuia ai i latou.

FESOASOANI MO FAIAOGA:

O le Aso Sa lenei ua faapitoa mo tamā, tatou te faatāuaina ai a latou galuega lelei, ma lo latou avea e fai ma o tatou tamā. O le tatou usiusita'i ma faalogo i o tatou tamā, o le sao tāua lea o i tatou mo nai o tatou tamā auā latou te faamanuia mai ai ia i tatou.

Ua oo ina matua le toeaina o Iakopo, ma ua ia lagona lona vaivai. Sa ia manatu alofa i lana fanau, ona ua ia lagona, ua oo i le taimi e maliu pe oti ai. Sa manatu ai, ina ia aami i lana fanau e to'a sefulu ma le lua (12) ina ia faapotopoto atu i le fale, se i faamanuia atu ia i latou.

Na gasolo ane le fanau e to'a sefulu ma le lua, o Reupena, Simeona, Levi, Iuta, Sepulona, Isakara, Tanu, Kato, Asera, Nafatali, Iosefa, ma Peniamina. Ua taito'atasi ma faamanuia i ai lo latou tamā o Iakopo. O le tiute lava o matua, o le a'oa'oina ma faasino fanau i mea e manuia ai.

GALUEGA FAATINO: Tusigā Ata

Ia saunia e le faiaoga ni pepa ma ni peni vali ma tuu i le vasega. Ia tusi mai lava e le tamaitiiti ia le ata o lona tamā, ma se upu mo lona tamā. Faamolemole e fesoasoani i ai tatou o faiaoga, i le galuega a le fanau.

PESE:

Faafetai le Atua mo lo'u tamā (x3)
I lana tausiga ia ita.
Ia faamanuia le Aso Sa o tamā (x3)
I lo latou valaauina.

A'OA'OGA:

1. E alofa lo'u tamā ia te a'u.
2. Ia faa-tāua o tatou tamā.
3. E alofa Iakopo ia lana fanau.

ASO SA 16 AOKUSO 2020.

MATAUPU: UA TAGI TAVITA INA UA OTI LONA ATALII

SINI: Ia a'oa'oina le vasega ina ia iloa, le mafuaaga ua tagi ai le tupu o Tavita.

TUSI FAITAU: 2 Samuelu 18: 24 – 33 (mo le Faiaoga)
2 Samuelu 18: 33 (mo le Vasega)

Ona mutimutivale ai lea o le finagalo o le tupu; ua alu ae ai le afeafe i luga o le faitotoa, ua tagi, ua faapea fano, "Lo'u atalii Apisaloma e, lo'u atalii e, lo'u atalii Apisaloma e! ta fia oti e sui ai oe Apisaloma lo'u atalii e, lo'u atalii e!"

FESOASOANI MO FAIAOGA:

O Tavita, o le tupu o Isaraelu. A o Apisaloma, o le isi lea atalii o Tavita. Sa lē faalogo le tama o Apisaloma i lona tamā, a ua faalogo i fautuaga sesē a i latou sa o latou faaosoosoina o ia ina ia fai ma tupu, e faatoilaloina le nofoaiga o lona tamā o Tavita. Ua fia tupu le tama o Apisaloma, ma ua fai ana auauna ma ana fitafita, faatasi ma lona manatu faamaualuga, ua sili atu le lagolagoina o ia e tagata ina ia fai ma tupu o Isaraelu. O le mafuaaga lea o le faia ai o le taua i le va o fitafita a Tavita lona tamā, ma ana fitafita.

Sa faiaina le au tau a Apisaloma le atalii, i le au tau a Tavita lona tamā. O le taua foi lena, na mafua ai le oti o Apisaloma. Ma o le mafuaaga lena o le tagi leotele ai o Tavita, ina ua oo atu le tala ua uma le ola o lona atalii o Apisaloma. Tiga lava le lē usita'i o lona atalii, ae ua sili lava ia te ia le alofa, ona o ia o le tamā. Ua tagi leotele foi Tavita ma faapea ane, “Ta fia oti e sui ai oe Apisaloma lo’u atalii e, lo’u atalii e”.

GALUEGA FAATINO: “Taligā Fesili”

1. O ai e lē usita'i i lona tamā?
2. Aisea na tagi ai Tavita?
3. E iai se taimi na tagi ai lou tamā ona o oe?

(Tuu atu i lau susuga i le faiaoga nisi fesili faaopoopo talafeagai mo le mataupu)

O le tāua o le galuega faatino lena, ina ia saga toe faamanatu ai pea i le fanau le tāua o nai o latou tamā, ma toe faatupuina ai le mafanafana o ia ma lona tamā.

PESE: “Faalogo ma usita'i”.

A'OA'OGA:

1. E leaga le lē usita'i.
2. E tiga lava ona leaga i tatou le fanau, e alofa lava tamā ia'i tatou.

ASO SA: 23 AOKUSO 2020.

MATAUPU: UA ALAGA LE TAMĀ O LE TAMA MA'I.

SINI: Ia malamalama le vasega i le mafuaaga na alaga ai le tamā o le tama na ma'i gūgu.

TUSI FAITAU: Mareko 9:20-24 (faiaoga)
Mareko 9:24 (vasega)

Ona alaga loa lea o le tamā o le tama, ua fai atu, "Le Alii e, ua ou faatuatua. Ia e fesoasoani i lo'u lē faatuatua".

FESOASOANI MO FAIAOGA:

O le ma'i gūgu, sa maua ai le atalii o le tasi toeaina, ua le o iloa lona igoa. E mafua le ma'i o si atalii lea, ona o le agaga leaga sa ia te ia. A oo ina oso le ma'i, e tafe lona fāua, lilivau ona nifo ma maa lona tino. Ua tele tausaga o maua ai si tama lea. Ua aumai e le tamā si ona atalii ia Iesu, ma ua omai faatasi ma le motu o tagata. Sa fesili Iesu i le tamā o le tama ma'i, "Talu mai anafea ona oo o lena mea ia te ia?". Ae tali le tamā, "Talu ina tama itiiti..." faatasi ma le talosaga a lea tamā i le Alii, na ia faapea atu ai, "a e peita'i, ai se mea e te mafaia, ia e alofa mai ia te i matou, ma ia e fesoasoani mai ia te i matou".

O le tali a le Alii o Iesu i le talosaga a le tamā, na Ia fetalai ai, "Ai se mea e te mafaia! E mafaia mea uma lava i lē faatuatua". E moomia e Iesu le faatuatua o le tamā ina ia ola ai lona atalii.

O le mafuaaga lea o le alaga po o le valaau leotele a le tamā ma valaau atu i le Alii o Iesu, "Le Alii e, ua ou faatuatua. Ia e fesoasoani i lo'u lē faatuatua". Ua faatuatua si toeaina pe ua talitonu ma faamoemoe le toeaina po si tamā mafatia i le Alii, ina ia faamaloloina le ma'i o si ona atalii.

O le alofa faa-tamā i fanau, e momoli i le Alii ma faatoga i le Alii ina ia faamalolo ma faamanuia i le fanau. Mo i tatou o le fanau, ia lagona le alofa o o tatou tamā ia i tatou uma.

Uiga o Upu:

- i) faatafiti - o lo o taoto ae tafitifiti solo
- ii) lilivau o nifo - e u nifo

E lelei le faatino e lau susuga i le faiaoga upu mo le malamalama atili o tamaiti.

GALUEGA FAATINO: Valivaligā Ata.

Fai ni kopi o le ata o loo auina atu ma tufa i le vasega e valivali.
Taumafai ina ia faamatala mai e tamaiti le ata o loo valivaliina.

PESE: O aao agalelei o Iesu.

A'OA'OGA:

1. O Iesu tatou te malolo ai.
2. E tatalo o tatou tamā mo i tatou.

ASO SA: 30 AOKUSO 2020

MATAUPU: UA MANATUA E PETERU LE UPU A IESU

SINI: Ia malamalama le vasega o le vivini faatolu o moa na manatua ai e Peteru le upu a Iesu.

TUSI FAITAU: Mataio 26: 69 - 75 (mo le Faiaoga)
Mataio 26: 75 (mo le Vasega)

“E le vivini moa se ia e faafiti faatolu mai ia te a’u.”

FESOASOANI MO FAIAOGA:

Tamaiti o Peteru, o ia o se tasi o so’o e sefulu ma le lua o Iesu. Ina ua pu’eina Iesu e tagata Iutaia, ona latou tuuina atu lea o Ia i le fale o le ositaulaga sili, ma fesiligia ai o Ia i fesili e tele.

O le taimi foi lea o lo o nofo Peteru i fafo i le faapaologa o le maota, ma lona popole pe o le a le iuga o le a oo i ai Iesu.

Le taimi tonu lava lea na faafitia faatolu ai e Peteru lona Alii o Iesu, ina ua iloa o ia e auauna teine ma ē na tutu latalata ane ia te ia. Ina ua faafiti faatolu Peteru e na te le iloa le Alii o Iesu, ona vivini ai loa lea o moa, ma manatua ai e Peteru le upu na fetalai atu ai Iesu ia te ia, “E le vivini moa seia e faafiti faatolu mai ia te a’u.”

Na manatua e Peteru lea upu a Iesu, ona ulufafo ai lea o ia mai le fale, ua tagi lotulotu. E taua pea ona tatou manatua pea lo tatou Alii, ma alolofa ia te Ia, auā o Ia o lo o alofa ia oe ma a’u.

Upu Faamalamalama:

- i) faafiti - musu e tautala ma faailoa le mea moni
- teena e aafia i le tuuaiga.
- ii) tagi lotulotu - tagi tautala.

GALUEGA FAATINO: Faafetaui (Matching)

Faafesootai faaiuga sao o fuaiupu o i le vaega A, o lo o i le vaega E

A

1. O Peteru o le
2. E faatolu ona faafiti
3. Na iloa Peteru
4. Na alu ese Peteru

E

- a) ma tagi lotulotu
- e) e le auauna teine
- i) so'o o Iesu
- o) Peteru ia Iesu

PESE: Pese masani mo tamaiti
“Iesu o le uō a tamaiti”

A’OA’OGA:

1. Manatua Iesu i taimi uma.
2. Aua le palaa’i – tautala i le mea moni.
3. Aua le popole.

UA MANATUA E PETERU LE UPU A IESU



MANATU TAIALA SETEMA MA OKETOPA: SAUNI I TAIMI UMA

O le manatu taiala o lenei masina o se faamanatu lea mo tamaiti ia saunia lelei ma mataala a'o ola tuputupu a'e.

ASO SA: 6 SETEMA 2020

MATAUPU: TAUPOU E TO'A SEFULU (10)

SINI: Ia malamalama tamaiti e atoatoa le fiafia i le saunia lelei.

TUSI FAITAU: Mataio 25: 1 – 13 (mo le Faiaoga)
Mataio 25: 13 (mo le Vasega)

O lea ia outou mataala ai, auā tou te le iloa le aso po o le itu aso.

FESOASOANI MO FAIAOGA:

Tamaiti, e i ai se isi e malamalama i le upu taupou? Ioe, o le teine po o le tamaitai nofo toatasi e le'i faia sona toalua po o sona aiga.

Sa i ai ni taupou e toa sefulu. Sa filifilia i latou e auai i se faaipoipoga. Sa o ma ave a latou moli e faatalitali ai le taimi e alu atu ai le tama faaipoipo. Sa lē mautinoa le taimi e alu atu ai o ia. Ua lagona le lē lavava ma ua fia momoe i latou. Ua oo i le taimi ua sau ai le faatoafaiava ua tataua ona tutu moli.

E toa lima taupou na sauni lelei i le avatu lea o fagu-suaau faaleoleo. A o le isi to'a lima e leai ni fagu suaau e faaleoleo. Ua popole i latou nei pepē a latou moli. Sa aisi i latou mo ni suaau, ae ua lē mafai ona maua. Ona o ai lea e faatau mai ni a latou suaau. E foi mai ua tapuni le fale, ua lē mafai ona ulufale i latou.

Tamaiti o latou la ia, na faaigoaina o taupou valea, a o le to'a lima ua i totonu o le fale ua ta'ua latou o taupou popoto. O taupou ua saunia lelei ma tapenapena i ni faaletonu ma ni mea e faafuasei ona tutupu.

Tamaiti, e tataua ona tatou sauni i taimi uma. Ia mataala ma tatalo i le Atua e fesoasoani mai ia i tatou. Aemaise i le feagai ai ma aoga ia ma faamaoni i le faiga o feau i totonu o aiga.

GALUEGA FAATINO: Matamata Ata

Fai ni kopi o le ata ua saunia atu e tufa mo tamaiti. Ave e matamata ai

PESE: Give me oil
Give me oil in my lamp keep me burning, burning, burning
Give me oil in my lamp I pray
Give me oil in my lamp keep me burning, burning, burning
Keep me burning till the break of the day.

Tali: Sing hosanna, sing hosanna
Sing hosanna to the king of kings
Give me joy in my heart keep me praising
Give me peace in my heart keep me loving.

A'OA'OGA FOU:

1. O le tagata potō e nofo sauni
2. E manao Iesu ia avea i tatou o tagata saunia lelei.

ASO SA: 13 SETEMA 2020

MATAUPU: O NOA NA FAU LE VAA

SINI: Ia malamalama tamaiti, o le usita'i o Noa i le Atua na faasaoina ai ma lona aiga.

TUSI FAITAU: Kenese 6: 9 - 12 (mo le Faiaoga)
Kenese 6: 9 (mo le Vasega)

O le tala lenei ia Noa, o Noa o le tagata amiotonu ia, ma le sao i e tupulaga ma ia, sa la feoai o le Atua ma Noa.

FESOASOANI MO LE FAIAOGA:

Tamaiti, o ai na fau le vaa? Ioe, o Noa. Na fauina e Noa le vaa ona o le faatonuga a le Atua. O Noa o le tagata amiotonu e faalogo ma usita'i i le Atua. E toatolu lana fanau o tama o Semu, Hamo ma Iafeta.

Ua silasila mai le Atua i le lalolagi ua leaga amio a tagata ona lē fiafia ai lea o Ia. Ua finagalo le Atua o le a soloiesea le lalolagi. O le a faaumatia tagata, o manu ma laau uma o i luga o le fogaeleele. Ona Ia faatonuina lea o Noa e fau se va'a mo ia, i le laau o le kofa. Ua ta'u mai foi i ai le fua atoa o le va'a, o lona umi ma lona lautele, ma le ata e fau agai i ai.

Tamaiti, e lē faigofie lea galuega e selau lua sefulu tausaga na fau ai le vaa o Noa. Sa apoapoi Noa i tagata, soia le faia o amio leaga, ia latou salamō ma omai e fesoasoani i le fauina o le va'a. E lei liliu tagata sa tupu pea lo latou fiafia e fai le agasala.

Na o Noa ma lona aiga ma manu na filifilia e ave i totonu o le va'a na faasaoina. E to'avalu tagata na faasaoina, o Noa ma lona toalua, o lana fanau e to'atolu ma o latou taitoalua, o manu e tailua mai i ituaiga na mafai ona totoe mai, ae ua faaumatia uma le lalolagi.

Ia tamaiti, ua a'oa'o mai le tala iā Noa. E lelei le usita'i i le Atua. Ia tatou ola tapena ma sauni e faasaoina ai i tatou mai ni faalavelave e tutupu.

GALUEGA FAATINO: Matamata i le ata ua saunia

(i) Fai ni kopi o le ata ua saunia, ave i tamaiti e matamata ai.

PESE: O ai na fau o le va'a?
Si alii o Noa
Aisea na fau ai?
Le Atua na fetalai
Noa fau se vaa tele
O manu ninii ma mau tetele, o oe ma lau fanau, feosofi tapuni mau.
(A'o le pese lea, ma fai ni taga)

A'OA'OGA FOU:

1. Usita'i i ou matua
2. O Noa na usita'i i le Atua
3. Sauni ma tapenapena e faasaoina ai oe.

ASO SA: 20 SETEMA 2020

MATAUPU: O LE TAMAITIITI E ANA ARETO MA I'A

SINI: Ia malamalama tamaiti sa fafagaina e Iesu le motu o tagata i areto ma i'a a le tamaitiiti.

TUSI FAITAU: Ioane 6: 9 – 14 (mo le Faiaoga)
Ioane 6: 9 (mo le Vasega)

O lo o iinei le tama o ia te ia areto karite e lima, ma nai i'a iti e lua lau; a e auma ea ia mea i ai latou e toatele?

FESOASOANI MO FAIAOGA:

Tamaiti o Iesu sa feoai ma ona so'o, sa o atu i aai, sa a'oa'o atu i tagata ma fai vavega. Sa latou faamalolo i ma'i eseese

Ua oo i le vai o Tiperia. Ua mulimuli atu le motu o tagata e toatele ia i latou, aua sa latou vaai i ma'i sa faamaloloina ma fia faalogologo i tala sa faamatalaina e Iesu. Ua iloa foi e Iesu ua fia aai i latou, aua ua leva le aso.

E le o i ai ni meaai ia i latou. Sa i ai le tupe, ae le lava ni areto e maua ai ona e toatele tagata. Ae peitai sa faailoa ane e Aneterea o lo o i ai se tamaitiiti ni areto karite e lima ma ni i'a iti e lua lau (lua i'a). Sa aumai ia Iesu, ona ia faafetai lea ma tufatufa atu i tagata.

Tamaiti, e matua toatele tagata sa i ai i lea mafutaga, ae sa maona uma i latou ma totoe areto ma i'a. Ia tamaiti, lelei lea tamaitiiti na alu sauni ma lana mea-ai, lea ua fa'aaogaina e Iesu e fafaga ai le motu o tagata.

GALUEGA FAATINO: Faatino le tala

1. Faatino le tala, sauni ni mea ai (fruits) po o nisi mea ai e lau susuga ia faasoa atu i le vasega.
2. Fai ni kopi o le ata ua saunia, e valivali e tamaiti

A'OA'OGA:

1. E manaomia foi le faasoa o au mea-ai mo isi au uo.
2. Ua fafaga e Iesu le motu o tagata.

ASO SA: 27 SETEMA 2020

MATAUPU: O LE PEROFETA O ELIA

SINI: Ia malamalama tamaiti o le fiafia o le Perofeta o Elia e tatalo i le Atua na saunia lelei ai o ia mo lona valaauina

TUSI FAITAU: 1 Tupu 19: 4 – 8 (mo le Faiaoga)
1 Tupu 19: 4 (mo le Vasega)

A ua alu o ia i le vao, o le savaliga o le aso e tasi, ona oo ai lea o ia, ma nofo i lalo o le ratami, ua ia faatoga atu ia oti o ia, ua faapea atu, "Le Alii e, soia, ia e ave ese lo'u ola, auā e le sili ona lelei o a'u i lo'u tamā."

FESOASOANI MO FAIAOGA:

Tamaiti, o ai foi ia na ave olaina i le lagi? Ioe, o Elia ma Enoka. Ia o lea o le a tatou talanoa i le Perofeta lea o Elia. O Elia, o le tasi o perofeta sili o lo o taua mai i le Tusi Paia. O lona nuu o Tipea. O le uiga o le igoa o Elia, O le Alii lo'u Atua,

E tele ni galuega sa valaauina ai Elia e le Atua na te faia. Ae o le Aso Sa lenei o le tala ia Elia ma Iesepela. O le avā lea a le tupu o Aapo. Sa mana'o le fafine lea e fasiotia Elia. Ona o Elia, sa ia faailoa ia Aapo ma le nuu a latou agasala aemaise lo latou ifo i atua ese.

Ua iloa e Elia lea fuafuaga ona sola ai lea o ia. Ua alu mamao lava i le vao. Ona malolo lea o ia i lalo o le laau o le ratami (o se laau tele, tupu mafalā, e maua ai le paolo e lelei mo le malolo)

Ua ia tatalo i le Atua e aveese lona ola, o lona uiga ua fia oti Elia. Ua taoto o ia ma moe peitai ua sau le agelu ma pa'i atu ia te ia, ua fai mai, "Ina tu ia i luga ina 'ai." Ia ua ala o ia ma iloa ai le potoi areto ua tunu i ma'a aasa ma le ipu vai. Ona 'ai ai lea o ia ma inu ua toe taoto.

Ua sau faalua le agelu ma pa'i atu ia Elia ma fai atu i ai, e tu i luga e 'ai auā e mamao le ala. Ona tu ai lea o ia ua maua lona malosī, ua toe fa'aauau lana malaga.

Tamaiti o Elia o se Perofeta e toaga e tatalo. O le auala lea e feso'otai ai o ia i le Atua e maua ai lona malosī e faatino ai lona valaauina. O Elia o le Perofeta e sauni i taimi uma.

GALUEGA FAATINO: Matamataga Ata

- i) Fai ni kopi o le ata ua saunia, e tufa i le vasega e matamata ai.
- ii) A'o le pese

PESE: Fai sau tatalo i le taeao
Fai sau tatalo i le ao
Fai sau tatalo i le po

E faafiafia ai lou loto.

A'OA'OGA:

1. O le tatalo a Elia na atoa ai lona saunia i lana galuega.
2. E mafai e le Atua ona fa'aatoatoa i tatou.

ASO SA: 25 OKETOPA 2020

MATAUPU: O LE POTU MO ELISAIA I SUNEMA

SINI: Ia malamalama le vasega, ia latou ola fiafia e fai mea lelei mo isi.

TUSI FAITAU: 2 Tupu 4: 8 – 11 (mo le Faiaoga)
2 Tupu 4: 10 (mo le Vasega)

Ia ta faia se afeafe itiiti i luga e fai i le pa puipui o le fale; ia ta tuu ai se moega mo ia, ma se laulau, ma se nofoa, ma se tuugālamepa; a sau foi o ia iā te i ta'ua, i le alu ane i ai o ia.

FESOASOANI MO FAIAOGA:

Sa i ai i totonu o le aai i Sunema se tasi sa'o tamaitai, sa fai ma ana masani le fa'aafe ane o le Perofeta o Elisaia i lona fale e malōlō ai. Ua avea lea tulaga ma ala na oso a'e ai se manatu i le loto o lenei fafine Sunema, ina ia la faia ma lona to'alua se afeafe po o se potu laitiiti mo Elisaia i luga o le la fale,

ina ia avea ma potu e mapu ma malōlō ai le perofeta o Elisaia pe a malaga atu i Sunema. Sa talia fiafia e lona toalua lona mana’o, ma ua la faia ai loa se potu i luga o le la fale.

Ua oo i le tasi aso, ona oo atu lea o le perofeta o Elisaia i le fale o lenei ulugalii, ma ua ia mapu ane ma malōlō i le potu sa faia mo ia e lenei fafine ma lona toalua.

Tamaiti, o le a’oa’oga tāua ua tatou maua mai i lenei tala, o le tagata ua ola fiafia ma saoloto e faia se mea lelei ma se mea sili mo le isi o ona uso a tagata, e aunoa ma se tau po o se totoi.

Uiga o Upu:

- i) sa’o tamaitai - o se fafine tāua ma fa’aaloaloga i se nuu
- o se fafine e tele le oa ma le tamaoaiga
- ii) afeafe itiiti - o se potu laitiiti sa fausia i luga o le fale
- iii) tuugālamepa - o tulaga sa tuu ai molīga’o

GALUEGA FAATINO: Valivaligā Ata

Ia fai ni kopi o le ata ua saunia ma tufa i le vasega e galulue ai.

PESE: Love is something that you give it away
Alofa o se mea e te faasoa atu

A’OA’OGA:

1. Ia tatou alolofa ma agalelei i so o se tagata.
2. Ia tatou fiafia e fai mea lelei mo isi.
3. Ia fiafia e tali ni mālō pe a afe atu i lou fale.

MANATU TAIALA O NOVEMA: FAALOGO MA USITA’I

O mataupu o lenei masina, o lo o faamamafa ai le moomia o le faalogo ma le usita’i i taimi uma. Faalogo ma usita’i i mea lelei, ae le o mea e lē lelei.

ASO SA: 1 NOVEMA 2020

MATAUPU: UA USITA’I SAKAIO IA IESU.

SINI: Ia malamalama le vasega, na usita’i Sakaio i le valaau atu a le Alii o Iesu.

TUSI FAITAU: Luka 19:1-8 (mo le Faiaoga)
Luka 19:6 (mo tamaiti)

Ona vave alu ifo ai lea o ia, ua talia o ia ma le fiafia.

FESOASOANI MO FAIAOGA:

Tamaiti! O ai foi na a'e i le laau? O Sakaio. Aiseā na a'e ai Sakaio i le laau? E fia matamata ia Iesu.

O Sakaio o le tagata ao lafoga. O lana galuega, o le aoina lea o lafoga a tagata mo le malo. O se galuega sa sili lona inosia e tagata uma, ona o le aveesea ai o se vaega o le tamāoaiga o tagata taito'atasi. Sa faamauina o ia o se tasi o tagata mauoa sa i ai i lea vaitau. O le manatu o tagata, e mafua ona mauoa, ona sa ia ao faasili lafoga a tagata. Ona ave lea o le lafoga sa'o a le Malo o Roma, a o le faasiliga, e tuu i lana ato.

O le ui ane ai o Iesu i Ieriko le nuu o Sakaio, na manatu ai o ia i le fia matamata ia Iesu. Peita'i, e faigata ia te ia ona o ia o le tagata puupuu saasaa. Ma o le mafuaaga lea o lona a'e ai i le laau o le sukamoru ina ia mafai ona ia vaai ma iloa ifo le Alii o Iesu. Na silafia lelei e Iesu le tagata o lo o i luga o le laau, ma Ia fetalai loa i ai, "Sakaio e, ia e vave ifoifo ia lalo, auā e tatau ona ou nofo i lou fale i le aso nei". O le faaolataga ua oo i le aiga o Sakaio, ma na matuā fiafia lona loto ina ua valaau le Alii ia te ia. A o ia, o le tagata ua leai ni ana uo, ona o lana galuega e inosia e tagata, faatasi ai ma lona ao faasili o lafoga a tagata. O le vave alu ifo o Sakaio mai luga o le sukamoru, o le faailoga o le tagata ua fiafia ma ua usita'i i le valaau mai o le Alii.

GALUEGA FAATINO: Valivaligā Ata

1. Fai no kopi o le ata o lo o auina atu i le tusi.
2. Tufa i le vasega mo le valivaliina.
3. Faaigoa mai tagata o lo o i le ata.

PESE: Ua soona olioli nei
Ua ou vivii ina faafetai
Iesu i lou alofa mai
Lou mana lea
Ua faailo mai
Ua matou manuia ai.

Tali: Faafetai Iesu, alofa mai
Ua matou manuia ai matou fiafia ai

A'OA'OGA:

1. A valaau mai loa Iesu, talia loa.
2. Ia faamaoni i le faatinoina o au feau.
- 3.

ASO SA: 8 NOVEMA 2020

MATAUPU: O PALAAMO MA LANA ASINI USITA'I

SINI: Ia malamalama le vasega i le mafuaaga o le usita'i o le asini a Palaamo.

TUSI FAITAU: Numera 22:18-28 (mo le Faiaoga)
Numera 22:27a (mo tamaiti)

Ua iloa e le asini le agelu a le Alii, ona taoto ai lea o ia i lalo o Palaamo.

FESOASOANI MO FAIAOGA:

Sa taunuu le nuu o Isaraelu o lo o taitaiina atu e Mose i le laueleele laugatasi o le nuu o Moapi, ma nonofo ai. Sa iloa e Palako le tupu o Moapi, ona popole ai lea o lona loto, ina ne'i faatoilaloina o ia ma lona nuu e Isaraelu, ona e le gata o le toatele o tagata, ae ua ia maua foi tala i le faatoilaloina e Isaraelu o isi nuu e pei o Amori. Ona tonu lea i le manatu o Palako le tupu o Moapi, ina ia aami le perofeta vavalo o le latou nuu o Palaamo, e sau e fetuu le nuu o Isaraelu mo ia, ona ua fai lava si toatele.

Peita'i, na faaali le Atua ia Palaamo ina ia aua nei ona alu, ma ia aua nei ona faia lea tulaga ia Isaraelu. Sa usita'i Palaamo i le Atua, ma sa ia ta'u atu i le tupu o Palako le finagalo o le Alii. Sa toe faatauanau lava e Palako le fesoasoani a Palaamo, ma ua ofo atu i ai se tau e pei o auro ma ario. O le mea ua tupu, ua mana'o le loto o Palaamo i auro ma ario. Ua usita'i loa ia Palako, ae le usita'i i le Atua. Ma ua tietie loa i lana asini, ma alu loa. Sa tupu le toasa o le Atua, ona ua le usita'i le toaina o Palaamo. Na iloa e le asini le agelu a le Atua o lo o tu ma lana pelu i le ala, ona ia fefe ai lea, ua alo ese mai le auala, ae oso i le togavao. Ua fiu Palaamo e sasa lana asini ua le usita'i atu ia te ia, ae ua sili le usita'i o le asini i le agelu.

O le iuga o le tala, e le i taunuu le mea na mana'o i ai le tupu o Moapi o Palako.

GALUEGA FAATINO: Valivaligā Ata.

1. Saunia ni kopi o le ata o lo o auina atu ma tufa i le vasega.
2. Ia valivali le ata ma ia taumafai e faaigoa ma faamatala le ata.

PESE: Faalogo ma Usita'i.

A'OA'OGA:

1. Usita'i i le Atua ae le o tagata.
2. Fai le mea sa'o ae le o mea sese.

ASO SA: 15 NOVEMA 2020

MATAUPU: O ANANIA MA SAFAIRA.

SINI: Ia malamalama tamaiti i le mea na tupu ia Anania ma Safaira.

TUSI FAITAU: Galuega 5:1 – 11 (mo le Faiaoga)
Galuega 5:1 (vasega)

A o le tasi tagata o Anania lona igoa, ma Safaira lana avā, na ia faatau atu le fanua.

FESOASOANI MO FAIAOGA:

O Anania ma Safaira, o se ulugalii i le taimi o le ulua'i Ekalesia. O i laua uma e nonofo i Ierusalem. O le vaiata lea sa tele ai o latou fanua ma fale, faatasi ma nisi tagata. O le toatele o isi tagata ua o latou faatau atu o latou fanua ma fale, ona maua mai lea o tupe ma tuuina atu i le au aposetolo, auā le atina'eina o le Ekalesia Kerisiano po o le lotu. Sa i ai foi la le fanua o Anania ma Safaira, na o la'ua faatau atu. O le mea ua tupu, ua maua mai le tupe, ma ua le ave uma e tusa o le ta'utinoga ua uma ona fai, auā le atina'eina o le Ekalesia. Ua ave le isi vaega o le tupe, ae ua tuu ia'i laua le isi vaega tupe.

O le itu sa sili ona lē lelei, o le pepelo o Anania, mulimuli ane ua sau foi lana avā o Safaira, ua faapena foi ona pepelo o ia. Sa fesili muamua Peteru i le tamāloa o Anania, ae pepelo. Ona oti ai lea o ia. Ua mavae atu nai aso ae sau lona to'alua o Safaira, toe fesili atu i ai Peteru ae pepelo foi, ma iu ai ina oti ai foi ma ia.

E mafai ona faamatala Anania ma Safaira, o se ulugalii e faalogo ae lē usita'i. E toatele tagata e faapena i le olaga nei. E faalogo ae le lagona. O nisi ua na o le falogo o taliga, ae leai se faatinoga. O le mea lenā e ta'u o le faalogo, ae lē usita'i.

E to'atele lava tamaiti e faapea o latou uiga. Ua a'oa'o mai lenei mataupu, i le lē lelei o lea amioga ona tatou faia. E moomia le faalogo ma faatino. Po o le faalogo ma usita'i.

GALUEGA FAATINO: Valivaligā Ata.

1. Ia saunia ni ata ma tufa i le vasega mo le valivaliina.
2. Taumafai e faaigoa le ata ma faamatala.

PESE: (Suliveta Kurene)

1. Ua ta'ua mai e le Tusi Sa sa fai ma faamanuiaga
E ofo atu le la fanua i le Atua
O le a la o ma faatau ae aumai uma lona tau
E leai se mea e pule ai ae aumai uma
Ma tuu atu i le lima o le faifeau

Ch: Ua tele tupe haha, faatau ai le fanua

Ua tonu i la manatu e sili ona vaelua
E le o iloa mai e se tasi, ae galo ai le maasiasi
Silasila mai fofoga o le Tamā i le lagi
La la la la la la la ho ho ho ho
Lea ua sau nei le tiapolo ma faasese o laua loto
Talofa e na o le toilalo popo.

2. Ua ala usu le toalua, faafeiloa'i le faafeagaiga
Faapea ai a maua ai so la viiga
Ae talofa e i le matagā ua oti uma i la'ua
Tatanu i luma o le fale ma faailoa atu i tagata
O le ulugalii na pepelo i le Atua.

A'OA'OGA:

1. Aua le ola pepelo i luma o le Atua.
2. Ia faamaoni i au ta'utinoga.

UA PEPELO ANANIA MA SAFAIRA



MATAUPU: UA FAALOGO LE TUPU I LE TINĀ ALOFA.

SINI: Ia malamalama le vasega sa faalogo le tupu i le lagona o le tinā e moni le alofa.

TUSI FAITAU: 1 Tupu 3:16-27 (faiaoga)
1 Tupu 3:26e (vasega)

Ona fai mai lea i le tupu o le fafine e ana le tama o loo ola, ua faapea mai, “Le alii e, avatu le tama o loo ola ia te ia, aua lava ne’i fasioti ia te ia”.

FESOASOANI MO FAIAOGA:

E toalua ni fafine po o ni tinā sa nonofo faatasi i le fale e tasi. Ua na o laua lava lo la fale. Na fanau le pepe a le isi fafine, ma ua fiafia lava lona loto. Ua mavae aso e tolu, ona fanau ai lea o le pepe a le isi fafine. Sa tofu nei fafine ma le pepe, ma ua fiafia uma i laua. Peita’i, o le tasi aso, e malamalama ifo le taeao, ma ua tago ifo le fafine sa fanau muamua i lana pepe, e lē o foliga ia o lana pepe. I le ma lea, ua uma le ola o si pepe.

Sa o nei fafine e toalua i luma o le tupu o Solomona, ma ua fai ai le finauga i pepe. Sa finau le tinā lea na muamua fanau ma ia fai atu i le tupu, “Ua oti le tama a lenei fafine i le po; auā ua tatao o ia ia te ia (pepe). Ona tula’i lea o ia i le tulua o po ma ao, ua ave ese la’u tama sa ia te a’u, a o moe lau auauna fafine. Ua ia faataoto ia te ia i lona fatafata, a ua faataoto mai e ia lana tama ua oti i lo’u fatafata. Na ou nofo i luga i le taeao e faasusu i la’u tama, faauta ua oti ia; ua ou matuā matamata i ai i le taeao faauta, e le o la’u tama tane na ou fanaua”. Sa finau mai le tinā o lo o i ai le pepe o lo o ola, e pepelo le tala a le tinā o lo o i ai le pepe ua oti. O lana pepe lava o lo o ia te ia.

Sa faia e le tupu o Solomona le faamasinoga o nei tinā ma a laua pepe. O lea na ia saunoa atu i ana auauna, ina ia aumai se pelu, ma ia isi lua le pepe o lo o ola, ina ia avatu le isi itu i le tasi, a o le isi itu i le isi. Sa faateia le tupu i le faapea atu o le tinā moni o le pepe o lo ola, “Le alii e, avatu le tama o loo ola ia te ia, aua lava ne i fasioti ia te ia”. O le lagona a le tinā e faamaoni lona alofa i si ana tama.

Peita’i le tinā pepelo, lē faamaoni, leai se alofa, sa ia finau atu ina ia faia le finagalo o le tupu, o le isi lua lea o si pepe. O le lagona o le tinā e le o i ai se alofa, ona e le o sana pepe moni.

O le faaiuga a le tupu sa faia, na ia toe faafoi le pepe o loo ola, i lona tinā moni, lea na talosaga ina ia aua nei faaoo le oti i si pepe. Ua ia faalogo i le tinā e moni lona alofa ina ia aua nei faaoo le oti a si ana tama.

GALUEGA FAATINO: Valivaliga Ata.

1. Fai ni kopi o le ata ma tufa i le vasega mo le valivaliina.
2. Taumafai ina ia toe faamatala le ata o loo latou valivaliina.

PESE: O le Atua e alofa ia te a’u. (My God loves me)

A'OA'OGA:

1. Ia faamaoni ma aua le ola pepelo.
2. E famaoni le alofa o le tina lelei.

ASO SA: 29 NOVEMA 2020

MATAUPU: UA USITA'I NAAMANU IA ELISAIA

SINI: Ia malamalama tamaiti, o le usita'i o Naamanu i le faatonuga a Elisaia na mamā ai lona lepela.

TUSI FAITAU: 2 Tupu 5: 8 – 14 (mo le Faiaoga)
2 Tupu 5: 14 (mo le Vasega)

Ona alu ifo ai lea o ia, ua fufui faafitu i Ioritana, e tusa ma le upu a le tagata o le Atua, ona foi mai ai lea o lona tino tuai pei o le tino o le tamaitiiti, ua mamā foi ia.

FESOASOANI MO FAIAOGA:

O Elisaia o le tagata o le Alii, po o le perofeta e nofo i Isaraelu. O Naamanu o le taitai au o le malo o Suria, e malosi, faamoemoeina e le tupu, ma e maua foi i le ma'i lepela. Ua fai atu Elisaia i le tupu o Isaraelu e aumai ia te ia, ma ia iloa ai o lo o i Isaraelu le perofeta a le Atua.

Ua sau Naamanu ma tu mai i le faitotoa o le fale o Elisaia, ua auina e Elisaia lana auauna ma faapea atu. Ina alu ia ina taele faafitu i Ioritana, ona toe foi mai ai lea o lou tino tuai ia te oe, ona e mamā ai lea.

Tamaiti, na ita Naamanu ma alu ese, ona e manatu lava ia, e sau i fafo le tagata o le Atua, e tu mai ma valaau i le suafa o le Alii lona Atua, ma talo lona lima i le mea ua i ai le ma'i e faatea ai le lepela, e le sili foi ona tele o vaitaele lelei o lo o i Tamaseko ou te taele ai ona mamā ai lea? A ua soso atu ana auauna, ma fai atu ia te ia, Sena e, ana fai atu le perofeta i se mea tele e te le faia ea? Na o le taele faafitu ona e mamā ai lea. Ona alu ai lea o Naamanu ma taele faafitu i Ioritana, ma ua mamā ai lona ma'i lepela, ua toe foi mai lona tino tuai, manaia ma aulelei.

Ioe tamaiti, faalogo ma usita'i i le finagalo o le Atua, e ala mai i ana auauna e manuia ai. Ae 'aua le masalosalo i le alofa o le Atua mo i tatou.

GALUEGA FAATINO: Valivaligā Ata/Taligā Fesili

1. Fa'aaoga le ata o loo i le mataupu e valivali e tamaiti laiti, po o le vaega E
2. Tali mai e tamaiti fesili o loo i lalo, pule lau susuga, pe fa'aaoga le pepa ma le peni, po o le fesili i ai ma ta'u mai le tali mo le vaega A.

FESILI.

1. O ai Elisaia?
2. O ai Naamanu?
3. Aiseā ua ita ai Naamanu ia Elisaia?
4. O fea na taele ai Naamanu ma mamā ai lona lepela?

PESE: O Elisaia o le Perofeta x 2
Ioe, ioe, e moni
Na māmā ai le ma'i lepela x 2
Ioe, ioe, e moni
Naamanu, masalosalo
I le faatonuga a Elisaia.

(fati: O Iesu e alofa i tamaiti x 2)

A'OA'OGA:

1. E ofoofogia le alofa o le Atua
2. O le faalogo ma usita'i e manuia ai.
3. Aua le ola masalosalo pei o Naamanu.

MANATU TAIALA O TESEMA: UA FANAU MAI LE TAMA

O le masina lava lenēi i tausaga uma, e auga lava mataupu i le Kirisimasi. O le faamoemoe ina tapena ai loto ma mafaufauga o le fanau, i le tāua o le Kirisimasi mo tagata uma, e faamanatu ai le aso na Afio mai ai le Faaola i le lalolagi, le pepe o Iesu.

ASO SA: 6 TESEMA 2020

MATAUPU: O LE ITA O HEROTA.

SINI: Ia malamalama tamaiti i le mafuaaga o le ita o Herota.

TUSI FAITAU: Mataio 2: 1 – 4 (mo le Faiaoga)
Mataio 2: 3 (mo tamaiti)

Ua faalogo i ai Herota le tupu, ona atuatuvaile ai lea o ia atoa foi ma Ierusalemā uma.

FESOASOANI MO FAIAOGA:

O Herota, o le tupu o le nuu o Iutaia sa i ai. Ua oo i le taimi e afio mai ai le Alii o Iesu e ala i lona fanau mai, ona tupu ai lea o le ita o Herota. Sa faalogo Herota, o loo saili e le au Makoi mai sasa'e le nofoaga o loo fanau ai Iesu, o le tupu o Ia o tagata Iutaia. Peita'i, o lea o loo ia nofo i le nofoa o le tupu i le taimi lea. Ua le o se talalele i le faalogo a Herota le Mesia ua fanau mai.

O le manatu o Herota, e leai se isi tupu, ua na o ia lava. E lē faigofie ona talia e Herota, le i ai o se isi tupu e tula'i mai, a o lo o avea o ia ma tupu. E le gata la i lea, a o le ita ai o Herota i le tala ua aumai, o le faailoga lava lea o lona teena o le Mesia ua fanau mai, e pei ona valoia ai e perofeta. O le ata manino o le tagata e na te lē talia Iesu i lona loto. Na oo lava lona ita i lona mana'o e faaoo le oti ia Iesu le Tupu ua fanau mai.

GALUEGA FAATINO: Valivaligā Ata.

1. Fai ni kopi o le ata o loo auina atu.
2. Tufa i le vasega mo le valivaliina.
3. Taumafai e toe faamatala le ata.

TAULOTO:

Makoi mai sasa'e mulimuli i le fetu
E saili le mea o loo fanau ai Iesu
Herota faalogo i le tala
Tupu lona ita ma lona taulamalama
Fia fasioti ia Iesu ua fanau mai
Talu ai lona popole ma lona palaai.

A'OA'OGA:

1. Aua le loto ita.
2. O le ita o le mea a satani.

ASO SA: 13 TESEMA 2020

MATAUPU: TATOU IFO I LE TUPU UA FANAU MAI.

SINI: Ia a'oa'o tamaiti ina ia malamalama, o tagata uma e tatau ona ifo ia Iesu le Tupu ua fanau mai.

TUSI FAITAU: Mataio 2: 1 – 11 (mo le Faiaoga)
Mataio 2: 11a (mo tamaiti)

*Ua latou ulufale atu i le fale, ua latou iloa ai le tama itiiti ma Maria lona tinā,
ona latou faapau ai lea ma ifo atu ia te ia;*

FESOASOANI MO FAIAOGA:

O le aso Sa na te'a nei, sa o tatou talanoa ai i le mafuaaga o le tigā ma le ita o le loto o Herota, ina ua ia maua le tala o lo o saili le au Makoi mai sasa'e i le mea o lo o fanau ai le tupu o Iesu. Ae o le aso Sa lenei, o le a tatou talanoa ai, ina ua maua e le au Makoi le nofoaga tonu o lo o fanau mai Iesu le Faaola. Sa mulimuli pea le au Makoi i le faasinoga a le fetu, ma i'u ai ina maua tonu le fale o lo o fanau mai ai le Tupu. Sa o latou ulufale atu loa i le fale, ma iloa ai le tama itiiti ma lona tinā. Sa faaalua lo latou faaaloalo i le Tupu ua fanau mai, e ala i lo latou faapauu ma ifo atu ia te Ia (Iesu). O le faapauu ma ifo, o se faaaliga o le loto maualalo ma le faaaloalo ua tuu atu i lē o lo o ifo atu i ai. O lea ua faatinoina e le au Makoi. Peita'i o le au Makoi, o ni tagata e popoto toe tele a latou oloa. E le gata ua latou ifo atu i le tupu ua fanau mai, ae sa o latou ofoina foi a latou meaalofa mo Ia, e pei o le auro, o le lipano ma le muro.

GALUEGA FAATINO: Faatinoga

1. E lelei ona faatino le tala.

PESE: O le fetu ua pupula mai
O le tama ua fanau mai
Olioli ia ma vivii
Ua soifua mai le Alii
O le tama x 3
O le folafolaga
(fati: Kirisimasi fiafia)

A'OA'OGA:

1. Ia tatou ifo ua fanau mai le Tupu le tupu.
2. Ia tatou fa'aaloalo i le Afio mai o le Tupu.